

अपरंच

TC/RAJ/RAJ/00095

राजस्थानी भासा अर साहित्य री तिमाही

● जनवरी-जून 2015 (संयुक्तांक) ●

सलाहकार मंडल

मोहन आलोक, गंगानगर

नंद भारद्वाज, जयपुर

डॉ. आईदान सिंह भाटी, जैसलमेर

ओम पुरोहित 'कागद', हनुमानगढ़

डॉ. नीरज दड़िया, बीकानेर

भासा आंदोलन विसेसांक

प्रधान संपादक

पारस अरोड़ा

संपादक

गौतम अरोड़ा

संपादन संयोग

शंकरसिंह राजपुरोहित, बीकानेर

डॉ. मदन गोपाल लढ़ा, महाजन

प्रह्लाद राय पारीक, पीलीबंगा

डॉ. गौरीशंकर कुलचंद्र, हनुमानगढ़

ओम नागर, कोटा

मुखौळ : संज्ञा उपाध्याय (संपादक 'कथन') दिल्ली

अंतरजाळ अंक संचालक : डॉ. नीरज दड़िया बीकानेर

टाइप सैटिंग : भंडारी ऑफसेट जोधपुर

साज सज्जा : रमेश व्यास जोधपुर

सगळा पद अवैतनिक

सदस्यता

अंक अंक रौ मोल : 30 रिपिया

अंक बरस रौ मोल : 100 रिपिया

तीन बरस रौ मोल : 250 रिपिया

आजीवन : 1100 रिपिया

इण अंक रौ मोल : 60 रिपिया

प्रकासक

अपरंच प्रकासण

A-360, सरस्वती नगर, बासनी, जोधपुर 342 005 (राज.)

दूरभास : 0291-2720796, 7877982810, 9413961800

e-mail : apranchrajasthani@gmail.com

web : www.apranch.wordpress.com

विगत

□संपादक री बात		
राजस्थानी भासा मान्यता आंदोलन— अबै आगै काई ? गौतम अरोड़ा		3
□पंचामरत		
क्यूं इत्ता नाराज / आपरै-म्हारै बिच्चै फरक	पारस अरोड़ा	5
डूंगर रौ हियौ / सफदर हासमी री मौत / कदमताळ	गोरधनसिंह शेखावत	10
सेँतीस घरां रौ गांव / कांमणी / टाबर रा सवाल	नंद भारद्वाज	15
हरी व्हेण री आस में तोप / मारग री मौत / खोट	चंद्रप्रकाश देवल	20
दीठाव रै बेजां मांय	तेजसिंह जोधा	24
□भासा-विगत		
राजस्थानी भासा रै आंदोलन रा आगीवांण	ओम पुरोहित 'कागद'	28
राजस्थानी भासा री मान्यता रौ सवाल	डॉ. आईदानसिंह भाटी	34
□गीत		
मायड़ भासा राजस्थानी	डॉ. बस्तीमल सोलंकी भीम	39
□कहाणी		
मेळौ	राजेन्द्र शर्मा 'मुसाफिर'	40
□अकल काव्यपाठ		
लावौ अर सबद / मजलां मारै हेलौ / मन री बात		
मिरग तिसणा / नैणां रा बोल / प्रभातियौ तारौ	वाजिद हसन काजी	45
□बात-बंतळ		
मान्यता आंदोलन नै तेज करणौ पड़ैला : के. सी. मालू	गौतम अरोड़ा	48
राजस्थानी नै मान्यता इणरौ वाजिब हक : भरत ओळ	गौरीशंकर कुलचन्द्र	49
□अनुसिरजण		
लीलाधर मंडलोई री कवितावां रौ उल्थौ	उल्थाकार : डॉ. नीरज दइया	51
□काव्य-गोस्ठी		
घट्टी	मुकुट मणिराज	56
दुस्मण दोस्त यादां	जेबा रशीद	57
अक और सदी	हरदान हर्ष	58
□पोथी परख		
म्हां जिकौ भेळे देख्यौ, देखजौ अबै अकला	डॉ. नीरज दइया	59
□रपट		62

संपादक की बात

राजस्थानी भासा मान्यता आंदोलन— अबै आगै काई ?

मायड़ भासा राजस्थानी रौ मानता आंदोलन सिरै चढ्यौ अर लारलै दिनां दिल्ली रै जंतर-मंतर माथै इण आंदोलन मांय लाग्योड़ी सगळी संस्थावां रै अकठ प्रयास सूं जबरौ धरणौ थरपीज्यौ। बीकानेर सांसद अर्जुनराम मेघवाल, जोधपुर सांसद गजेन्द्रसिंह शेखावत, राजस्थानी भासा मान्यता समिति रा श्री के.सी. मालू अर माणक रा संपादक पदम मेहता इण धरणै री अगुवाई करी। मायड़ भासा राजस्थानी छात्र मोरचा अर मोट्यार परिषद आंदोलन मांय ऊरमा भरी अर धरणै माथै बडी संख्यां मांय पूग्या छात्र अर युवा आंदोलन नैं रोजगार सारू जरूरी आंदोलन रै रूप सरकार साम्हें राख्यौ।

राजस्थानी भासा मान्यता आंदोलन रै इतिहास मांय पैली बार अक संगठित जन आंदोलन अर जननेतृत्व, जनवादी तरीकै सूं साम्हें आयौ अर आंदोलन अक साहित्यिक आंदोलन री बाड़ तोड़ जन सारू मुगत व्हियौ। सरकार नै भी लखायौ कै अबै टाळ सोरी कोनी। स्यात सरकार सारू भी राजस्थानी-भोजपुरी-भोती भासा नैं मान्यता री मांग बिहार चुणाव री दीठ सूं महताऊ ही। नतीजौ कै प्रधानमंत्री अर गृहमंत्री दोनू आंदोलनकारी पदाधिकारियां नै बगत दियौ, मिळ्या अर सरकार कानी सूं मान्यता री दिसा मांय काम करण रौ भरोसौ दिरायौ। सरकारी वादा मानसून सत्र मांय भासा मान्यता सारू संसद में विधेयक राखण सूं सरू होया। पछै चुणाव पैली केबिनेट मांय प्रस्ताव लावण री बात होयी। लारूलार केई लोग जस लेवण री खेचळ ई सरू करी। राजस्थानी रा हेताळू तै कर्यौ कै सरकारी बात माथै भरोसौ राखणौ है।

पण अबै, अबै आगै काई ?

मानसून सत्र गियौ, बिगर चुणाव री तारीखां आयगी। चुनावी आचार संहिता आयगी, नीं नीं तौ विधेयक आयौ, नीं कोई केबिनेट रौ प्रस्ताव ई आयौ, नीं कोई सरकारी घोसणा व्ही। राजस्थानी भासा अकर फेरू राजनीति री ठगी मांय ठगीजगी। काई सरकारी खेचळ जस री चावणा मांय फीतै रै कटण री बाट जोवै ? काई साच्याणी कोई तकनीकी अडचन है ? काई सरकार दब्योड़ी आवाज मांय संयुक्त राष्ट्र री जकी बात कैवती, उण माथै कायम है ? काई चुनावी घोसणा-पत्र साच्याणी चुणावी जुमलौ हौ ? काई अक राष्ट्र, अक धरम, अक भासा रौ सिद्धांत आपां सूं आपां री मायड़ भासा रौ हक खोसै ?

कीं व्हौ, अबै राजस्थान री जनता अर मायड़ भासा रा हेताळुवां नैं तै करणौ है कै आगै काई ? मंच री घोसणा मुजब अनसन ! तौ कद ? आगै राजस्थान बंद ! तौ कद ?

राजस्थानी भासा आंदोलन री इण लड़ाई में राजस्थानी भासा री अक जिम्मेदार पत्रिका होवण रै नातै अपरंच भी आंदोलन रौ हिस्सा है। अपरंच रौ औ अप्रैल-सितंबर अंक राजस्थानी भासा मान्यता आंदोलन अंक है। आ खुसी री बात है कै भासा आंदोलन आज अक जन

आंदोलन रै रूप विगसाव लियौ है अर राणीसा अर कन्हैयालालजी सेठिया स्यात आंदोलन रौ औ ईज रूप देवणी चावता। अंक वानै निवण सागै समरपित।

अर जे बात 'अपरंच' री करां तौ म्हें पाठकां सूं इण अंक मांय हुयी देरी सारू माफी चावूं, कारण पारसजी नै हृदयाघात अर वारी अस्वस्थता है। पत्रिका काढण मांय आर्थिक अबखायां भी जबरी है। वार्षिक अर त्रैवार्षिक सदस्यां री सदस्यता खतम व्हेगी, पण घणकरां पाठक आपरै वार्षिक चंदै पछै पाछौ सदस्यता शुल्क नीं भेज्यौ है? अबै अक्टूबर-दिसंबर ताई आजीवण सदस्य बणावण री तेवड़ी है। नीचै अबार ताई रै आजीवण सदस्यां रा नांव दियोड़ा है, आगलै अंक मांय आप भी आपरौ नांव जोड़ सकौ, उडीक रैसी। आगूंच आभार।

-गौतम अरोड़ा

अपरंच रा आजीवण सदस्य

नांव	ठौड़	रसीद सं.
1. श्री रमेश उपाध्याय	दिल्ली	10
2. स्व. श्री ईश्वर चंद्र अरोड़ा	जयपुर	13
3. श्री नंद भारद्वाज	जयपुर	24
4. श्री दाऊलाल अरोड़ा	बड़ौदा	26
5. श्री चैनसिंह परिहार	जोधपुर	33
6. श्री रतन शाह	कोलकाता	34
7. श्री नारायण राहड़	सूरत	36
8. श्री सत्यप्रकाश अरोड़ा	जोधपुर	37
9. श्री मोहन आलोक	गंगानगर	41
10. श्री सूरज प्रकाश जी डाबला	पीलीबंगा	49
11. श्री फारुक आफरीदी	जयपुर	53
12. श्री नारायण सिंह पीथल	जयपुर	55
13. श्री मीठेस निर्मोही	जोधपुर	56
14. श्री मेहरानगढ़ म्यूजियम ट्रस्ट	जोधपुर	62
15. श्री श्यामसुंदर भारती	जोधपुर	66
16. श्री मदन गोपाल लढ़ा	महाजन	70
17. डॉ. अर्चना शर्मा	चूरू	--
18. श्री रामचरण परिहार	जोधपुर	196
19. डॉ. भरत ओळ्य	हनुमानगढ़	71

● पंचामरत : अेक

पारस अरोड़ा

सन् 1937 में राखी रै दिन अजमेर में नानाणै जलम । आपरी कवितावां जुलम, अन्याव अर झूठै दिखावै रै खिलाफ आम आदमी री आवाज बण'र उण सूं जुड़ै । मिनखाजूण री हिमायत करतां वै पाखंड अर जुलम रै सांम्ही अेक मजबूत पख री सिरजणा करतां उणसूं आपरौ जुड़ाव थरपै । 'जाणकारी', 'दीठ' अर 'माणक' रै संपादन सूं जुड़्या अर 'अपरंच' रौ संपादन-प्रकासण करै । आपरौ उपन्यास 'खुलती गांटां' खासौ चावौ हुयौ । 'झळ', 'जुड़ाव' अर 'काळजै में कलम लागी आग री' कविता-संग्रै छप्योड़ा । हिन्दी कवि मंगलेश डबराल रै कविता-संग्रै 'हम जिसे देखते हैं' रौ राजस्थानी में 'म्हां जिकौ देखां' रै नांव सूं उलथौ कियौ, जिकौ साहित्य अकादमी, नई दिल्ली सूं छप्यौ । हिन्दी कवि राजेश जोशी री लंबी कविता 'समरगाथा' रौ राजस्थानी उलथौ ई छप चुकौ है । उपन्यास 'खुलती गांटां' नै विष्णु हरि डालमिया पुरस्कार अर कविता-संग्रै 'जुड़ाव' नै राजस्थानी ग्रेजुएट्स नेशनल सर्विस एसोसियेशन (बम्बई) रौ पुरस्कार मिल्यौ । राजस्थानी भासा, साहित्य अर संस्कृति अकादमी, बीकानेर सूं विशिष्ट साहित्यकार सम्मान ई मिल्यौ ।

ठिकाणौ : अे-360, सरस्वती नगर, बासनी, जोधपुर-342005

क्यूं इत्ता नाराज

इत्ता नाराज क्यूं हौ बापू
जे म्हैं नीं मानी थारी बात
गयौ परौ
थारै बरजतां थकां ई बारै
लारै
थे उडीकता रैया म्हारी बाट ।

कुण कियौ आकास इत्तौ बदरंग

अपरंच (जनवरी-जून, 2015) ● 5

दिसावां

क्यूं आपरी ओळख गमाय दी
क्यूं फेर जमीं
पांणी बदळै लोही री मांग करै ?

थे आरां उत्तर नीं देय सकौ
परवा नीं,
म्हें बिना उत्तर नीं रैय सकूं ।

जे म्हें गयौ परौ

गरम हवा

अर धारदार हालात साथै

गस्त लगावतै

खतरै साम्ही / मुकाबलै सारू / मित्रां साथै

उकेरतौ सवालां रा जवाब

तौ क्यूं उदास आंगणै

थे बेराजी ओढ अबोला व्हेगा ।

थे इज कैवता

वां दिनां / उण बगत / नीं सुणी

किणी री थे

अर निकळगा हा बारै

आपरी जमीं / आपरै आकास री

घोसणावां करता

नरभक्सी, अंधारी दिसावां रै मांय

लारै थांरी बाट जोवती रैयी

घर री थळी

तूटोड़ी मचली नीचै फाटोड़ी जूत्यां

अेकांनी उदास पड्यौ

टाबर रौ गाडूल्याँ

तद सुणौ कोई री थे

मानी किणी री ?

फौलाद सूं बतौ मजबूत व्हे आदमी

दावानळ सूं बत्ती तेज व्हे, अंतस री लाय

थे साबित करी

भोटा पड़गा दमन रा तमाम हथियार
थां लोगों सूं टकरीज 'र
पाछा पड़ण लागा हा, साही घोड़ां रा पग
थांरी अगन-झळ में अपड़ीज 'र
खतरौ उण बगत ई कम नीं हौ
सूखगी ही कटोरदान मांयली रोटी
दुखियारण रसोई में सोयगी ही
थांनै देवण साय झरुंटिया मंडाय 'र ई
दोय पाका बोर लियोड़ै
सोयगौ हौ म्हें / थांरी बाट उडीकतौ
दादोसा री मारग मुखी आंखियां
नीं झपकी ही सारी रात ।
हाल ई / भर-सरदी देखूं थांनै टसकता
उण रात जिण विध थे झेल लिया बार
पसवाड़ा फेरण लागै वा जूनी मार
उण बगत थे
सगळ्हा रिस्ता झाड़-झटक
गया परा बेलियां रै लार ।
पच्छै, इत्ता नाराज क्यूं हौ बापू
जे म्हें नीं मांनी थांरी बात ।

म्हारी बात / म्हारी जमीं / म्हारै आकास सारू
देखौ बापू
इण बदरंग व्हियोड़ै थांरै आकास सारू
गयौ परौ काटीज्योड़ै फौलाद रा
छिलका उतारण
लेय रंदौ
बणा टोळौ
गुण-अवगुण थांरा पाळतौ
रैवूं म्हें चालतौ
धरौ
धरौ म्हारै मोर थांरौ हाथ
बापू, इणमें नाराजगी री किसी बात ।

आपरै-म्हारै बिच्चै फरक

घणौ फरक है श्रीमान
आपरै अर म्हारै
अेक रिपियौ खरच करण में ।

आप भार हळकौ करौ
म्हारै रिपियौ भारी पड़ जावै ।
फरक पड़ै चीजां नै
अेक निजर देखण में ।
पुसप री सुगंध लियां पछै ई
आप पुसप रै बारै व्हौ
अर म्हैं मांयनै
आघा रैय 'र ई
दूजां रै निजू में
सैंध मारता व्हौ
अेक सरीर
कित्ता घरां माथै पसार 'र रैवौ ।

हरेक जरूत
आपरी मुट्टी में बंद व्है
म्हारी व्हौ के आपरी
हरेक चीज
जाणै व्है आपरै बाप री ।

स्याही बिखेरता उचपळा टाबर ज्यूं
दुनिया रै गोळै माथै आप
बिखेरता रैवौ खून अर म्हैं
म्हारी फाटोड़ी कमीज सूं
उणनै पूंछतौ रैवूं ।

बडौ फरक है श्रीमान
आपरै अर म्हारै
सोचणै-समझणै अर
बोलणै-बतळावणै में ।

क्यूं क्यूं आपरी भासा
हरेक बगत गाळी रौ अरथ देवै
म्हारी भासा अरथ सेवै !
सौख व्है आपरौ सोच
म्हारै सोच में फिकर भेळी रैवै,
आपरै समझण नै कीं नीं रैयौ
म्हें आपनै समझ रैयौ हूं,
थाक्या ई नीं आप
बेवजै बोलणै सूं
म्हारी बोलण री बारी ई नीं आई ।

आप चीजां नै
लगातार बेकार कर रैया हौ
म्हारी हद सूं
घणी बारै कर रैया हौ ।
आप अबै बिसाईं खावौ
चुप व्है जावौ !

अबै म्हें बोलूला
अर आप सुणोला
म्हें करूला
जिकौ आप देखोला
घणा दिन याद राखोला !

देखणौ अर समझणौ
बोलणौ अर बतव्वावणौ
तोड़णौ अर घड़णौ
सहेजणौ अर संवारणौ
जीवण री अेक कला है श्रीमान
जिकी आपनै अजै सीखणी है
अर म्हें आपनै सिखावूला ।

घणौ फरक है
आप में अर म्हारै में ।

ॐ ॐ

● पंचामरत : दो

गोरधनसिंह शेखावत

सन् 1943 में झुंझनू जिलै रै गांव गुड़ा में आपरौ जलम हुयौ। आधुनिक राजस्थानी कविता में नुवै रचनाबोध रा चावा-ठावा कवियां में सू अेक। ग्रामीण जीवन री विसंगतियां अर आथड़ नै आपरी कवितावां में उजागर करी। वारी संवेदना सदा बगत सू बाथेड़ा लेवता आदमी सू जुड़ियोड़ी रैयी। आप बरसां लक्ष्मणगढ़ रै तोदी कॉलेज रै हिंदी विभाग में प्राध्यापक अर अध्यक्ष रैया। 'किरकिर', 'पनजी मारू', 'खुद सू खुद री बातां' कविता-संग्रै रै अलावा 'तीसमारखां' अर 'बस्तीराम' (नाटक), 'अेक फौजी शहीद' (उपन्यास) छप चुका है। हिन्दी अर राजस्थानी में सोध-आलोचना री अनेक पोथ्यां ई प्रकासित व्हे चुकी है। राजस्थान रत्नाकर, दिल्ली सू सम्मानित। राजस्थानी भासा, साहित्य अर संस्कृति अकादमी, बीकानेर सू विशिष्ट साहित्यकार सम्मान। दूजी केई संस्थावां सू सम्मानित।

ठिकाणौ : न्यू रोडवेज डिपो रै सांम्ही, सीकर (राज.)

डूंगर रौ हियौ

अबकै खूब
गाज्या बादळ
अर डूंगर रै माथे थमग्या
अबकै खूब किड़की बिजळी
अर डूंगर आंख्यां मींच रै
काठौ रैयग्यौ
ठाडी बिरखा सूं
उणरौ पोर-पोर भीजग्यौ
ल्यौ
खूब उग्याई घास
गोडा सूदी
गाय-ढांढां रै
हुयगी मौज
हस्यौ हुयगौ

गुवाळिया रै हिरदै
हरख उमड़्यौ
अब डूंगर में
टूकाळ्या चढ बोल्या मोर
अलगोजां सूं गूज्यौ
आखौ भाखर
चकरी री दाई
नाची धरती
आमूला, गंगेङ्या
अर गूलर सूं
लदपद हुयगा सगळा बिरछ
टाबरां रै
चढग्यौ कोड
बैवतै नीझर में न्हावण रौ
अर मीठा खडुल्ल्या
खावण रौ
जीव-जिनावर
सगळा दूक्या डूंगर कांनी
अबकै खूब हुई बिरखा
अर जोर सूं उतरुया नाळा
पण फेरूं भी
डूंगर रौ हियौ
खाली रौ खाली रैयगौ ।

सफदर हासमी री मौत

थारौ नीं दोस
सफदर
थारौ नीं
इतिहास रै पोड़ा मांय
ईयां ई धधकता रैया
अगनी कुंड
अर ईयां ई जोतां रै
च्यानणै में
अडिग रैया मोटा भाखर

हाथ टूटता रैया
मूरत घड़ीजतै कारीगरां रा
तीखा सबदां रै नस्तर माथे
ईयां ई उठता रैया तूफान
अर मचता रैया घमसांग

बरसतौ रैयौ खून
जमीन रै काळजै में
धूजता रैया पग
नीलै आभै रा
रोही री सूनियाड़ में
बाजता रैया बाजा
कुदरत री झोळी सूं
फूंकारता रैया काळा नाग
लीलतौ रैयौ बखत
सांच री ऊगती छीयां नै
अर तसवीरां जड़ती रैयी
फूलां री मैकार

आदम जुग सूं
हुवतै इण जुद्ध रा सिपाही
सफदर, नीं मिटै
थारी मौत रा मांडणा
नीं भूलै थारै
'हल्ला बोल' री पीड़
जुग-जुग ताईं

जद भी तणसी मुक्की
जद भी हुवैली
आंख्यां लाल
जद भी उटैली
हक री बात
सफदर !
थूं आतौ रैवैलौ याद
ईयां ई ईयां

थारौ नीं दोस
सफदर ! थारौ नीं
म्हें सांच कैवूं।

कदमताळ

म्हें खुद कैवूं
तोडौ ई भरोसै रै डूंगर नै
ई रै माथै चढतां-चढतां
गोडां रै मांय
पाणी भरीजगौ

आं सबदां रा
अब अरथ पलटौ
आंरी स्यांणप सूं
घणी नफरत
हुवण लागी
क्यूंकै औ सबद
घणा चालाक हुयगा

अब हरेक री
चरितकथा नै समझणै रौ
बखत नीं
खून रै इतिहास नै
काटौ
जटै लग थे काट सकौ
सांची मानौ
मत राखौ
आं उणियारां सारू हेत
सेवट
चोखौ है आं सूं परै रैवणौ
वडेरां री लीक माथै
चाल 'र बडा नी बणोला
थे फालतू में
मुरदा भोम रा
नुंवा अरथ खोजणौ चावौ

थानै
सांच कैवूं
छेड़ा हटजावौ
अळगा-साव अळगा
काईं थारै
पसीने में ताव नीं

संकळप नै
धोबा सूं उछाळौ
सुरू करौ अेक जातरा
बिना पीठ ठोक्यां

म्हें अब भी कैवूं
आं बारणा-दरूजां सूं
अै पग मोड़ौ
डूंगर री बरोबरी
नीं सही
नाळा रौ खूंखाट
साव आपरौ है
पछै नाळौ बैवतौ
नदी में मिलै या
बिचै सूख जावै

कीं म्हारी बात रौ ई
भरोसौ करौ
गैलायां छोड़ौ
सज आवै ज्यूं
घोड़े सवार हुवौ
म्हें तौ आई
कैय सकूं हूं
मत करौ कदमताळ
म्हारा भंवर
मत करौ कदमताळ
अेक ई ठौड़।

ॐ ॐ

● पंचामरत : तीन

नंद भारद्वाज

1 अगस्त 1948 नै बाङ्गमेर जिलै रै गांव माडपुरा में जलम। आप राजस्थानी अर हिन्दी, दोन्यू भासावां में गद्य अर पद्य री अनेक विधावां में लारलै चाळीस बरसां सू निरंतर लिख रैया है। आकाशवाणी अर दूरदर्शन रा वरिष्ठ अधिकारी रैया। आप सामाजिक सरोकारां अर लोकतांत्रिक मान-मोल रा प्रबळ हिमायती रैया। तीन बरसां ताई राजस्थानी री चावी पत्रिका हरावळ रा संपादक रैया। पोथी रूप राजस्थानी में 'अंधारपख' (काव्य), 'दौर अर दायरौ' (आलोचना), 'सांम्ही खुलतौ मारग' (उपन्यास) अर 'बदळती सरगम' (कहाणी-संग्रै) छप चुका है। हिन्दी में केई पोथ्यां छप्योड़ी। नेशनल बुक ट्रस्ट सारू राजस्थानी कथा संकलन 'तीन बीसी पार' रौ संपादन अर साहित्य अकादमी सारू 'आधुनिक भारतीय काव्य संचयन : राजस्थानी' रौ अनुवाद अर संपादन। आपनै साहित्य अकामी पुरस्कार, मारवाड़ी सम्मेलन मुंबई रौ सर्वोत्तम साहित्य पुरस्कार, राजस्थानी भासा, साहित्य अर संस्कृति अकादमी रौ नरोत्तम स्वामी गद्य पुरस्कार अर के.के. बिड़ला फाउंडेशन रौ बिहारी पुरस्कार मिल चुका है।

ठिकाणौ : 71/247, मध्यम मार्ग, मानसरोवर, जयपुर-302020 (राज.)

सैंतीस घरां रौ गांव

सैर रै पसवाड़े
सूधै जीवण रौ परियाण
सिरकतौ सींवां सोधै—
अेक सैंतीस घरां रौ गांव
चौगिड़दै सूनियाड़ पड़ी है
बधती आबादी री अबखाई
अठै सूती खुरड़ाटा भरै,
धिराणी सगळै दिन बैठी—
थूक बिलोवै—
कंवळै पर उडीकता टाबर
गिरण करै—
—मां भूख मरां।

धिराणी भूजै
अर दुरकार करै—
अबोला मरौ अघोर्यां ।
(क्यूं लाज गमावौ ?)
रम्मौ नीं बारै जाय र,
दिनूगै पैली काम करां
या भूख मरां ?

काम ।
सगळै दिन काम-ई-काम
काम रौ कांई नांव
कब्बर खोदणौ भी काम है
अर बूरणौ भी काम—
आ ई कैया करै
औ सैंतीस घरां रौ गांव ।

कांमणी

थूं—
म्हारै वहेणै रौ आधार
आधी सामरथ
आधी निबळई
जीवण रौ आधौ सार—

थूं पसर्योड़ी कंवळी माटी
तालर में पांघरती
काची दूब रै उणियार
रूंखां री लीली ओप
थूं आभै री पुड़तां में तिरती बादळी
कांठळ में काटकती-खिंवती बीज
धोरां अर चरणोयां माथै
धारोळां औसरतौ ठाडौ नीर
थूं नेह सूं भरियोड़ी नाडी
बावड़ी

थूं विगतां अर गीतां री आधी बात
वौ आधै हेले सूं पैली आवणौ !
वा माईतां री ऊंडी झीणी सीख
अगनी री झाळां तपियोडी कंचन-कांमणी,
ऊमावै हामळती नुंवी जिनगाणी रौ बोझ
ओकळियां उतरती आई
हेताळू रै आंगणै—
सांभी थूं अबखै जीवण री ढीली डोर
आबळ बंधाई माटे मारगां,
अंधारै जगायां राखी आस
पोखती रही बीखरतै कुळ रा कायदा !

बरसां अर ऊमर री आडी घाल
थूं कठीनै सिधाई सोरठ-सोवणी
कठीनै अदीठ व्हियो थारौ आधोचार
क्यूं लागै बिलखी तरुणापै तीजणी !
क्यूं बधती लागै
पगां हेठली जमीं माथै भार—
आ म्हारी मांयली मार
थूं किण हीलां सूं बणगी म्हारी
कांमणी !

धरम री पोथियां कैवे
थूं बणगी मिंदर री पूतळी
सरधा अर भगती में थारी
बुझगी अंतरजोत
माळीपानां में छिपग्यौ दीपतौ उणियारौ,
ख्यातां में सोध्यां
लाधै न्यारी ई साख
रीत रा गीतां में चावौ रूसणौ !

किण दावै अंगेजूं थारी आंण
किण बूतै बचावूं ऊघड़ती आबरू
म्हारी बाथां ताई पूग
थूं कठीनै अलोप व्हेगी नार

थनै सोधतौ भटकूं
महैं ऊजड़ में उरभाणौ !

औ च्यारूंमेर
हाकां-दाकां हालतौ संसार
आ समदर में हिलोळा खावती
बेपतवारी नाव
औ बेकळू री थाग में
ऊतरतौ अबखौ पंथ,
आ काळ सूं कूटीजियोड़ी भोम
औ टोपां-टोपां सांगळतौ
अखूट जुलमी अंधारौ
आ सूंसाड़ा करती रात
औ आंधी अर बचूळं सूं
बाथेड़ा करतौ महैं
महारा पगां पूगती आव
महारी मानेतण !
अंतस में अंगेज ऊंडी दाझ—
—गाज !

कै बदळै ऊजड़ रौ आगोतर
जिनगाणी रौ सुरंगौ बाजै साज
सिरजां सांसां में नुंवी जीवारी !

टाबर रा सवाल

अबखा अर अबोट सवालां में
अणजाण्यां हाथ घालणौ
टाबर री आदत व्है—
आगूंच वौ अंदाजै कोनी
अबखाई रौ अंत
अर थाग लेवण उतरतौ जावै
अंधारी बावड़ी री पेड़ियां !

टाबर रा वां अणचींत सवालां रौ
वौ काई पडूतर देवै

जिका आभाचूक हलक सूं बारै आय
ऊभ जावै सांम्ही अर
हालात सूं बाथेडौ करण री हूजत करै

जीसा !

आपां ने क्यूं देखणौ पड़ै
कोई रै मूंडै सांम्ही,
क्यूं ऊभणौ पड़ै राजमारग रै अेडै-छेडै
बोलां कोई री अणूती जै-जैकार
अर क्यूं कदेई अबोला बैठणौ पड़ै
आपां ने इच्छा परबारै ?

कैडी अणचींती दुविधा है
अेकांनी टाबर री भोळी इच्छावां
स्यांणी संकावां

अलेखूं कंवळा सपना
अर बापरती काची नींद,
दूजै कांनी आ कुजरबी
परबसता री पीडु—
उणरी आंख्यां सांम्ही घूमै
टाबर री इच्छावां
अर सवालां सूं जूंझै उणरौ मन,

सेवट धूजता पग
चाल पड़ै मतै ई उण गेलै
जिकौ अेक अंतहीण जंगळ में
गम जावै—

कानां में फगत गूंजती रैवै
टाबर री धूजती आवाज
थे यूं अणमणा कठीनै जावौ जीसा !
दोफारां आपां नै सै र जावणौ है—
म्हनै आजादी री परेड में साथै रैवणौ है,
थे यूं अबोला कठीनै जावौ जीसा ?

ॐ ॐ

● पंचामरत : चार

चंद्रप्रकाश देवल

उदयपुर जिले रै गांव गोटीपा में 14 अगस्त, 1949 रै दिन आपरौ जलम हुयौ। राजस्थानी री अनेक विधावां में आप सिरजणा भासा री साख बधावण रौ काम कियौ। 'पागी', 'कावड़', 'मारग', 'तोपनामा', 'राज-विजोग', 'उडीक पुराण', 'झुरावौ', 'हिरणा, मून साध वन चरणा' अर 'तीजौ अयन' आपरा काव्य-संग्रै। हिन्दी में ई 'आर्तनाद', 'स्मृतिगंधा', 'अवसान' अर 'बोल माधवी' काव्य-संग्रै प्रकासित व्है चुका है। इणरै अलावा भारतीय भासावां रा केई चावा रचनाकारां री पोथ्यां रै अलावा सेम्युअल बैकेट रै नाटक 'वेटिंग फोर गोदो' अर दोस्तोवस्की रै 'क्राइम अँड पनिसमेंट' रौ राजस्थानी में अनुवाद कियौ। सूर्यमल्ल मीसण रै चंपू महाकाव्य 'वंश भास्कर' रौ संपादन अर प्रकासण कियौ। 'पागी' नै साहित्य अकादमी पुरस्कार मिल्यौ। राजस्थान साहित्य अकादमी, उदयपुर सूं मीरां पुरस्कार, राजस्थानी भासा, साहित्य अर संस्कृति अकादमी रौ सूर्यमल्ल मीसण शिखर पुरस्कार अर दूजा केई मान-सम्मान मिल चुका है।

ठिकाणौ : 74, बलदेव नगर, माकड़वाली रोड, अजमेर (राज.)

हरी व्हेण री आस में तोप

खसमांखांणी तोप नै इचरज व्है
जद उणनै ठाह पड़ै
कै उणरै दांत छोड बत्तीसी ई कोनी
इण नवा अेलम रै पांण
वा आपरै बोखै मूंडै सूं मुळकै।
मन रौ औ बोझ ओछौ पड़्यां
वा दिन रा ई सपना देखै।
जाणै हांपौ चरावता गवाळिया
जिका म्हनै घोड़ौ जांण सवारी करै
म्हारौ गळौ पकड़ लटूबै
वै म्हनै अछूत नीं गिणै।
उणरै हांचळा पांनौ आवू-आवू व्है
उणरी इच्छा है आ अेक निकेवळी

कै किणी दिन
आं मांय सूं कोई छोरौ
लुक-मीचणी रमतौ
म्हारै मांय लुक जावै
तौ म्हेँ ई डाकण
आपरी सरजीवण कूख रै भरम
मां गिण परी खुद नै
मुगत व्हेँ जावूं!
पीळौ ओढण री ओसियाळी
म्हेँ दवागण
अकर हरी व्हेँ जावूं
बळबळता गोळा जणती थाकगी हूं।

वा आपरा बोखा बाका री गळाई
आपरी कूख फाड़्यां
अवचल उडीकै है
मनोग्यांना।
सूती-सूती ऊभ-छठ करती
अबोली
गढ री परकेमां में
कदास, उणरी मनजांणी व्हेँ।

मारग री मौत

टंवळ्यां खावतौ
हालतौ-हालतौ मारग
जद कद ध्रोब रा पातळा पानां माथे पूगै
धूजण लागै

मारग अर ध्रोब
अेक दूजा माथे मंडण री
आफळ करता
आंम्ही-सांम्ही बदळै आपरी जूण
कदैई विणसै ध्रोब
कदैई मारग।
पण जद तांणी

इण आवगी प्रथमी माथे
रेवैला बच्चोड़ी कटैई
कोई चिड़कली
वा हरमेस धोब री साख भरैला
अर प्रथमी मारग री

चिड़कली अर पहुमी
अै दोनूं नीं मरै कदैई
अेकणसागै ।

खोट

गलती उणरी
कै लोग-बाग उणरी आंख्यां में
क्यूं हेत 'र अपणांस री अेक पातळी नंदी निरखता

गलती उणरी
कै सुण उणरी बात
क्यूं ढळ जावती हेम लोगां रै कांनां
क्यूं वनी रा सुसिया-हिरण कर लेवता
आपरा कांन ऊभा,

गलती उणरी
कै उणरै बोल्यां
क्यूं खिल जावता पुसप ई पुसप
क्यूं चिड़कल्यां उणरै साद सूं साद लैय
आपरी चूं चूं उगेरती
सरासर गलती उणरी
कै भाईलोग उणनै
क्यूं वारै मांयलौ इज अेक गिणता
हळबोळ गफलत
कै वौ अैडौ क्यूं हौ ?
उणनै जैडौ व्हैणौ चईजतौ
वैडौ नीं व्हैय वैडौ क्यूं हौ
क्यूं वौ बायरी 'र चांदणी माफक
सगळ्यां नै लागती

अक सलरुळी हेडडडणी
गलती उणरी
कै क्यू उणरल सुकन गलणतल डलनख
क्यू उण धंधलडलडरल रे डललुडलं डलवी-ऑीडणी
लुग सरू करतल आडरु धंधु।

गलती उणरी
कै क्यू वु सगळलं ऑैडु व्हैड
सगळलं सू नुडरु हू।
इण 'क्यू' डलथै डडु डीठ
अकलणकक अक डलन
अक कवल री
उण सलरऑी अक कवलतल
इण 'क्यू' रे आसंग-डलसंग

वु ऑीवतु ऑलगतु डूरडडूर डलनख
कवलडलं डलंड रुडुऑुडलं कैडु
व्हैड 'र' रेडगुडु डगत अक डलतुर
अक ठैरुडुडु डुडल
ओडडलवलं ई ओडडलवलं सू लकडक
अक ओडडल व्हैगुडु
सुऑलंण डलठकलं लग डूगतलं
वु कलई सू कलई व्हैगुडु,

वु व्हैगुडु अक सुऑुडुडु 'र'
सलणगलरुडुडु सलक
इण सलक नै सुण 'र'
डलळु सुऑलडलं उण लग नीं डूगीऑै
कवलतल रल डुऑ सुं
उण गत रुंख डण नीं ऊगीऑै

कुडनी आडलं रे टैड डलंड खुठ
गलती उणरी
कै वु वैडु क्यू हू
नीं व्हैवल ऑैडु क्यू हू।
ॡ ॡ

● पंचामरत : पांच

तेजसिंह जोधा

आपरी जलम 7 जुलाई 1950 नै ह्यौ। बगत रै साथै बदळता जीवन रा मान-मोल नै आपरी कवितावां रै जरिये सांम्ही लाया अर राजस्थानी री नुंवी कविता रा आगीवाण कवियां में अेक। आपरी लंबी कवितावां सूं अेक न्यारी 'ज ओळख बणाई। 'राजस्थानी— अेक' अर 'दीठ' जिंसी पत्रिका सूं अेक नुंवी दीठ री सिरजणा करी। सोध पत्रिका 'परंपरा' रै हेमाणी अंक में आधुनिक राजस्थानी कविता री गैराई सूं पढ़ताल करी। राजकीय महाविद्यालयां में प्राध्यापक अर विभागाध्यक्ष रैया। पोथी रूप 'ओळूं री ओळियां' छपी। कीं पत्रिकावां में लंबी कवितावां छपी।

ठिकाणौ : गाव-रणसीसर, वाया डीडवाणा, जिलौ-नागौर (राज.)

दीठाव रै बेजां मांय

दो पग
दाब्यां जावै है रग-रग
आं ध्वनि-बिहूण गतां रै बिचै सूं
लगोलग
लगोलग
नैड़ी, नैड़ी, नैड़ी आवतोड़ी थूं
पेट री लाय भुगतै मां
म्हें जीवण री जुगत जोड़ूं

औ डील
तर-तर सूंतीजतौ डील
अै हाथ
तर-तर छाती पर आता हाथ

अक धूज
घांटी
खुद रै ई बोझ सू पड़तोड़ी
अै आंख्यां
कठैई सेंचनण में चिमकी लेतोड़ी

अक लखांण
कै अळगै ताई आगै-लारै मां
अक लखांण
कै अळगै ताई अेड़ै-छेड़ै मां
अक लखांण
कै अळगै ताई ऊपर-नीचै मां
अक लखांण
कै ऊठती मां
कै पड़तां-आखड़तां मां-मां
थूं दीठाव सू बेजां बारै ही
म्हें दीठाव रै बेजां मांय हौ ।

मां !
म्हें थनै सांभी हूं मां
घणी-घणी वार
किणी ढाळ में सुर री आंट
कै जठै, सै कीं तिसळ्यौ-तिसळ्यौ
कै संभ ज्यावै
मूडै री उण मरोड़, जिकी रोवण सू पैली आवै
आंगळी री आंख रै उण उणमान
जिकौ पगां ल्यावै
म्हें थनै पैरी-ओढी हूं मां
केई-केई वार
जीयां कै सीयाळै टाबर
फूलाळैण रै अस्तर आळी गूगी
हाथ-पगां रा मोजा
अंवेरी हूं थनै
जीयां कै टाबरपणै काच रा कंडा

झींटियै री बात
बधस्थोड़ी चूड़्यां, बिलिया अर पांखां
बस मां
औ कीं पैरणौ-ओढणौ
सांभणौ-अंवेरणौ ई तौ म्हारै सारै हौ
थूं दीठाव सूं बेजां बारै ही
म्हें दीठाव रै बेजां मांय हौ।

मां!
वौ कैड़ौ सपनौ हौ मां
कै जिकौ थनै, ढळती रात रा लड़गौ
तद, जद म्हें गरभ हौ
अक अटपटाटी रै मांय तै व्हेतोड़ौ

मां!
कीं अैड़ौ ई तौ हौ वौ सपनौ
कै जिणरौ जिकर
थूं निरा दिन पछै ताई करती रैयी
सपनौ
कै जिण में
अबखी रिंद-रोह्यां लाग्योड़ी लाय
थूं म्हनै ऊंचायां, घीसतां भागती जाय
थारौ औ सपनौ
मां,
थूं दीठाव सूं बेजां बारै ही
म्हें दीठाव रै बेजां मांय हौ

मां!
स्ट्रैटोमाइसिन रा इंजेक्शन
अकानी मेल दै मां, अर भरोसौ राख
कै म्हें अब सिगरेट नीं पीवूंला
थारा सीवणै री मसीन पर चालता वां पगां री सौगन
जिकां री सोजन

म्हें सासती
म्हारी पलकां माथे अंगेजतौ रह्यौ हूं
पण बात वा ई है मां
थूं दीठाव सूं बेजां बारै है
म्हें दीठाव रै बेजां मांय हूं

थूं पेट री लाय भुगतै
म्हें
जीवण री जुगत जोड़ूं—
साव वीयां रौ वीयां
थनें च्यारूंमेर सूं खिंवण नै खपतौ ।
जीयां के जलम ताई थूं
म्हनै भे अर विसमै रै बिचै खिंवण नै मिळी
अर म्हें, म्हारै में
कान, नाक, आंख, जीभ अर चामड़ी री गत लिखी
मां !
थूं दीठाव रै बेजां बारै ही
अर म्हें
दीठाव रै बेजां मांय हौ ।

ॐ ॐ

● भासा-विगत

राजस्थानी भासा रै आंदोलन रा आगीवाण

ओम पुरोहित कागद

जिण भांत राजस्थानी भासा घणी जूनी है उणी भांत राजस्थानी भासा रौ मानता आंदोलन पण जूनौ पड़तौ जाय रैयौ है। राजस्थानी भासा री मानता रौ आंदोलन आजादी सूं पैली ई सरू होयग्यौ हौ। मानता आंदोलन रौ पैलड़ौ संख 21 फरवरी 1925 में 'तरुण राजस्थान' अखबार में स्वतंत्रता सैनाणी अर पैलड़ा मुख्यमंत्री जयनारायणजी व्यास बजायौ। इण रै बाद सन् 1944 में आज रै बंगलादेश रै दिनाजपुर कस्बे में ठा.रामसिंहजी री अध्यक्षता में अखिल भारतीय राजस्थानी साहित्य सम्मेलन रौ बडौ जळसौ होयौ। इण जळसै में राजस्थानी भासा माथे 56 पेज रौ परचौ पढीज्यौ। इण सम्मेलन में राजस्थानी भासियां री अेकता अर भासा री मानता रा प्रस्ताव पास होया जिणरौ असर आखै मुल्क में होयौ। इण सम्मेलन में रामदेव चोखाणी, तुलसीराम सरावगी, ईश्वरदास जालान, जगदीशसिंह गहलोट अर रघुनाथ प्रसाद सिंघानिया आंदोलन रा आगीवाण बण्या। 1958 में रतनगढ में राजस्थानी भासा सारू लूठौ जळसौ होयौ। इण जळसै में अद्भुत शास्त्री, पूनमचंद बिश्नोई, सुमनेश जोशी अर किशोर कल्पनाकांत भाग लियौ अर मानता री बात उठाई। वां दिनां किशोर कल्पनाकांत रतनगढ सूं 'ओळमों' अर अद्भुत शास्त्री 'कुरजां' नांव री पत्रिका काढता। 1968 सूं 75 ताई जोधपुर अर बीकानेर में राजस्थानी भासा री मानता सारू घणां ई राजस्थानी सम्मेलन होया। इणी दिनां रावत सारस्वत 'मरुवाणी' पत्रिका काढी अर राजस्थानी री मानता रौ मुद्दौ उठायौ। रावत सारस्वत अर श्रीलाल नथमल जोशी 1974-75 में राजस्थानी भासा प्रचार समिति बणाई अर उणरै मारफत राजस्थानी भासा में प्रथमा, मध्यमा, विसारद अर पारखी नांव सूं परीक्षावां करवाई, जिण रा आखै देस में परीक्षा केन्द्र बणाईज्या अर हजारों लोगां अै परीक्षावां दीवी।

●

देश में 1971, 81अर 91 में हुई जनगणना में राजस्थानी भासा प्रचार समिति राजस्थान रा सगळा जिलां रै साथै साथै देस-भर में बढ-चढ'र भाग लियौ। भांत-भांत री प्रचार सामग्री, पोस्टर अर बैनर आद बणाईज्या अर बांटीज्या जिणां में अपील करीजी कै जनगणना प्रपत्र रै

मातृभासा आळै कॉलम में आपरी मायडू भासा राजस्थानी लिखावौ। आं बरसां में जिलावार जळसा कर कर'र भी इणरौ प्रचार करीज्यौ। आं बरसां रै दौरान विधानसभा, लोकसभा अर राज्यसभा में सरकारू अर निजू विधेयक भी राखीज्या, जिणमें राणी लक्ष्मीकुमारी चूंडावत, लक्ष्मीमल सिंघवी, डॉ. करणीसिंह, पूनमचंद बिश्नोई, भैरोसिंह शेखावत, कुंभाराम आर्य, महाराजा गजसिंह, महाराणा मेवाड़ आद घणी ई खेचळ करी। देस-भर री अर प्रदेश री मोकळी संस्थावां मानता आंदोलन रौ झंडौ उठावौ अर धरणा-प्रदरसण कर्या अर जळसा-जळूस कर्या। दिल्ली, मुंबई, कोलकाता, नागपुर, मद्रास अर देश रा दूजा स्हरां में ई राजस्थानियां जोरदार आंदोलन कर्यौ। राजस्थानी भासा सारू मरणौ मांडणियां साहित्यकार माणक तिवाड़ी 'बंधु' 15 अक्टूबर 1996 नै उच्चतम न्यालय, दिल्ली में राजस्थानी भासा री मान्यता सारू एक जनहित याचिका लगाई। 1995-96 में मुख्यमंत्री भैरोसिंह शेखावत राजस्थानी भासा रै उन्नयन अर मानता सारू अेक सरकारू कमेटी बणाई, जिण रा अध्यक्ष सौभाग्यसिंहजी शेखावत नै थरपीज्या। इण कमेटी खासी खेचळ कर'र अेक लूँठौ प्रतिवेदन बणाय सरकार नै सूँप्यौ, पण वां दिनां सरकार में बैठ्या लोगां अर ब्यूरोक्रेटां बात नै सिरै नीं लागण दी। 1975-76 में ई समूळै देस में राजस्थानी भाषा नै संविधान री आठवीं अनुसूची में भेळण रै पख में प्रपत्रां माथे दस्कत करण रौ लूँठौ अभियान छेडीज्यौ। इण अभियान में राजस्थानिया जबरौ अर इतौ उछाव दिखावौ कै दस्कतां आळै प्रपत्रां रा गाडा भरीजग्या।

● आज सूँ 30-32 बरस पैली जयपुर में डॉ. बलरामजी जाखड़ री अध्यक्षता में अेक लूँठौ जळसौ होयौ जिणमें राजस्थानी भासा री राजमानता सारू होयै मोडै प्रयास पेटै दुख परगटीज्यौ अर आंदोलन तेज करण रौ प्रस्ताव राखीज्यौ। इण सूँ पैलां 1968 में बीकानेर रै भारतीय विद्यामंदिर सोध प्रतिष्ठान री छात माथे राणी लक्ष्मीकुमारी चूंडावत री अध्यक्षता में राजस्थानी भासा समिति रौ अेक जळसौ होयौ जिणमें नरोत्तमदास स्वामी, विद्याधर शास्त्री, मुरलीधर व्यास, मूळचंद प्राणेश, कुं. चंद्रसिंह बिरकाळी अर दूजा साहित्यकारां अर राजनेतावां भाग लियौ। इण जळसै में राजस्थानी भासा री राजमानता रौ प्रस्ताव पास कर'र केन्द्र अर राज्य सरकार नै भेजीज्यौ। 1971 में बीकानेर रै सोनगिरी चौक माथे डॉ. मनोहर शर्मा री अध्यक्षता में अेक राजस्थानी साहित्य सम्मेलन होयौ जिणमें ढाई-तीन हजार री भीड़ भेळी होई। औ पैलौ मौकौ हौ जद राजस्थानी भासा री राजमानता रौ मुद्दौ जन आंदोलन बणाईज्यौ। इण सम्मेलन में महाराजकंवर नरेन्द्रसिंह, अगरचंद नाहटा, मूळचंद प्राणेश, धनंजय वर्मा, मुरलीधर व्यास आद अनेक साहित्यकारां अर विद्वानां आपरा विचार राख्या अर राजस्थानी भासा री राजमानता रौ प्रस्ताव पास कर'र सरकार नै भेजीज्यौ। 1970 में कोलकाता रा रतन शाह राजस्थानी पत्रिका 'लाडेसर' रौ मुरलीधर व्यास विशेषांक काढ्यौ जिकौ राजस्थानी भासा री राजमानता मुद्दै माथे क्रांतिकारी विचारां सूँ भर्योडौ हौ। राजस्थानी भासा री राजमानता सारू 1943 में महाराजा गंगासिंहजी रै देवलोक होवण रै बाद राजकुमार सादुलसिंहजी गादी बैठ्या अर वां राजस्थानी भासा रै बधेपै सारू 1944 में ठा.रामसिंह री देखरेख में 'सादुल राजस्थानी रिसर्च इंस्टीट्यूट' री थापना

करवाई। 1943 सँ 1991 ताई राजस्थानी री राजमानता सारू मोतीलाल मेनारिया, जनार्दनराय नागर, नरोत्तमदास स्वामी, गौरीशंकर हीराचंद ओझा, मुनि जिनविजय, हरिनारायणजी पुरोहित, हिंगळाजदान, हीरालाल शास्त्री, जयनारायण व्यास, सागरमल बैगाणी, भंवरलालजी वैद, सुभकरण सुराणा, रामकरण आसोपा, कन्हैयालाल सेठिया, कुं चंद्रसिंह बिरकाळी, नानूराम संस्कृता, मोहन आलोक, हरीश भादाणी, रघुराजसिंह हाड़ा, प्रेमजी प्रेम, मोहम्मद सदीक, विजयदान देथा, चंद्रप्रकाश देवल, करणीदान बारहठ, जनकराज पारीक, मदन गहलोत, विद्यासागर शर्मा, रूपराम आशादीप, वी.अन.कौशिक, हनुमान दीक्षित, ओम पुरोहित कागद, करणीदानसिंह राजपूत, सीताराम महर्षि, किशोर कल्पनाकांत, श्याम महर्षि, लक्ष्मीनारायण रंगा, शिवराज छंगाणी, कमल रंगा, किरण नाहटा, बैजनाथ पंवार, कल्याणसिंह शेखावत, शक्तिदान कविया, ओंकार पारीक, सांवर दइया, पारस अरोड़ा, तेजसिंह जोधा, गोरधनसिंह शेखावत, नागराज शर्मा, मनोहरसिंह राठौड़, रघुनाथसिंह शेखावत, पदम मेहता, मीटेश निरमोही, कानदान कल्पित, मूळदान देपावत, नंद भारद्वाज, उपेन्द्र अणु, ज्योतिपुंज, चेतन स्वामी, मदन सैनी, बुलाकी शर्मा, भंवरलाल भ्रमर, मालचंद तिवाड़ी, बी.डी.कल्ला, गोपाल जोशी, मक्खन जोशी, मानिकचंद सुराणा, गोकुल पुरोहित, मोहन छंगाणी, जोगेश्वर गर्ग, सूर्यकांता व्यास, घनश्याम तिवाड़ी, भीम पांडिया, मनोहरलाल गोयल, गुलाबचंद कोटडिया, प्रेमचंद कोठारी, कुंदन माली, नेमनारायण जोशी, हरमन चौहान, भविष्य दत्त भविष्य, मुकुट मणिराज, सम्पत सरल, कमर मेवाड़ी, जहूरखां मेहर, दलपत परिहार, जुगल परिहार, भंवरजी भंवर, लक्ष्मणदान कविया, पवन पहाड़िया, रामनिवास लखोटिया, ताराप्रकाश जोशी, कल्याणसिंह राजवत, अर्जुनदेव चारण, श्रीमंत कुमार व्यास, वेद व्यास, डॉ.के.एल. शर्मा, सूर्यकरण पारीक, अम्बालाल माथुर, नारायणसिंह भाटी, गणेशीलाल व्यास, सीताराम लालस, जगदीश माथुर, बुद्धिप्रकाश माथुर कमल, मनोहर शर्मा, कन्हैया सहल, सुमेरसिंह दइया, देव कोठारी, भगवतीलाल व्यास समेत सैंकडू साहित्यकारां आप-आपरै इलाकां में आंदोलन रौ झंडौ ऊंचायां राख्यौ।

● सादुल राजस्थानी रिसर्च इंस्टीट्यूट, बीकानेर 1956 में नानूराम संस्कृता रै काव्य-संग्रै 'कळायण' अर श्रीलाल नथमल जोशी रै उपन्यास 'आभै पटकी' रै लोकारपण बेळा भासाशास्त्री डॉ. सुनीतिकुमार चटर्जी आया। चटर्जी इण बेळा बडी भीड़ में राजस्थानी भासा पेटै इतिहासू भासण दियौ जिकै राजस्थानी भासा आंदोलन नै ऊरमा दी। इण मौकै इटली रा राजदूत कॉन्सल तिबेरिया भी आया। बीकानेर में 1979 में मरुधरा संस्था रै मारफत मानता आंदोलन री बात घणी तीखी अर ताता तेवरां साथै करीजी। इणी बगत कमल रंगा, ओंकारश्री, अम्बालाल माथुर रै बडेरचारै में आंदोलन सारू नुंवी नीति बणाई अर इण पेटै राजस्थानी युवा लेखक संघ बणायौ अर मानता आंदोलन नै जन-आंदोलन बणाय नुंवी दिसा दी। कमल रंगा साथै अविनाश माथुर, डॉ. मदनमोहन व्यास आद जुड़्या। इण संघ 1979 में बीकानेर रै कोटगेट साथै इतिहासू धरणौ लगायौ जिणमें हजारू लोग जुड़्या। राजस्थानी युवा लेखक संघ 1980 में हरीश भादाणी रै बडेरचारै में पैली बार राजस्थानी नै आठवीं अनुसूची में भेळण रै साथै-साथै इणनै दूजी

राजभासा बणावण री मांग जोर-शोर सूं उठाई। इणमें लक्ष्मीनारायणजी रंगा भासा रै संवैधानिक तथ्यां नै सांम्हीं राख्या अर मोहम्मद सदीक, मदन केवलिया, ओंकारश्री, अविनाश माथुर, अरविंद बोड़ा, आनन्द गुप्ता, डॉ. तनवीर मालावत, मदनमोहन व्यास, भंवर मोदी, शिवलाल हर्ष, माणक आचार्य आगै बध हुंकार भरी।

●
सन् 1990 में डॉ. बी.डी. कल्ला अर जोगेश्वर गर्ग मिल र सत्तापक्ष अर विपक्ष रै सगळै विधायकां रौ राजस्थानी भासा नै आठवीं अनुसूची में भेळण अर दूजी राजभासा बणावण रौ साझौ सहमति-पत्र मुख्यमंत्री भैरोसिंह शेखावत नै दियौ। इण सूं पैली जयपुर में लक्ष्मीकुमारी चूडावत, पूनमचंद बिश्नोई, डॉ. बी.डी. कल्ला, जानकी नारायण श्रीमाळी, पृथ्वीराज रतनू, बी. अेल. माली अशांत, ओंकारसिंह लखावत, सरला माहेश्वरी, श्याम महर्षि, वेद व्यास, कमल रंगा, मदन मोहन व्यास आद अैडौ ग्यापन मुख्यमंत्री मोहनलाल सुखाड़िया नै दियौ जिणमें करौली रा तीन विधायकां नै टाळ र 197 विधायकां रा दस्कत सहमति में हा। 1991 में बीकानेर रै रायसर गांव में प्रधानमंत्री राजीव गांधी रौ काफिलौ रोक र राजस्थानी री मानता सारू राजस्थानी युवा लेखक संघ कमल रंगा रै नेतृत्व में ग्यापन दियौ। इण सूं पैली वै बीकानेर में पैलड़ी प्रधानमंत्री इंदिरा गांधी सूं चरचा कर मांग करी अर ग्यापन सूंय्यौ। 1992 में जनता दळ रा विधायक नत्थीसिंह विधानसभा में विरोध कर्यौ तौ जद जनता दळ रा राष्ट्रीय अध्यक्ष चौ. अजीतसिंह बीकानेर आया तौ राजस्थानी युवा लेखक संघ कमल रंगा रै नेतृत्व में विरोध जतायौ तौ वां लिखित में भरोसौ दिरायौ कै आज रै बाद म्हारी पार्टी राजस्थानी रौ विरोध नीं करैला। सन् 1992 में बीकानेर में राजस्थानी भाषा मानता संघर्ष समिति रौ गठन होयौ अर नुवै सिरै सूं लड़त मंडी जिणमें ओंकार पारीक, श्रीलाल नथमल जोशी आद हा। इणरै बाद अेक और संघर्ष समिति जिणमें श्रीलाल नथमल जोशी, देवकिशन राजपुरोहित, देवदास रांकावत जुड्या। आं समितियां री साखावां सगळा जिलां में बणी। जालोर में मोहनलाल सिद्धावत आत्मदाह री धमकी दी तौ कोलकाता में कन्हैयालाल सेठिया उपवास माथै बैठया। विधानसभा में डॉ.बी.डी. कल्ला सेठियाजी रौ उपवास तुड़ावण री मांग सरकार सूं करी। इणी बगत संसद में राजस्थानी नै टाळ र जद कोंकणी नै आठवीं अनुसूची में जोड़ दी तौ राजनीति में लाय लागगी अर राजस्थानी भासा नै कोंकणी भेळै आठवीं अनुसूची में नीं जोड़ण रै विरोध में जोधपुर रा महाराजा गजसिंह अर सांसद गुमानमल लोढा रै नेतृत्व में दिल्ली रै वोट क्लब माथै इतिहासू धरणौ दिरीज्यौ। इण धरणै माथै आखै देस सूं राजस्थानी साहित्यकार, वौपारी अर नेता जुड्या। वोट क्लब माथै सितम्बर 1992 नै लाग्यै इण धरणै में राजस्थान सूं बसां भरीज-भरीज दिल्ली गई। धरणै रै आयोजन सारू दिल्ली रा प्रवासी राजस्थानियां अर सांसदां सैयोग कर्यौ। धरणै में हरखचंद नाहटा, रामनिवास लखोटिया, पदम मेहता, बलराम जाखडू, नाथूराम मिर्धा, ओंकारसिंह लखावत, कल्याणसिंह शेखावत, विजयदान देथा, चंद्रप्रकाश देवल, गिरिजा व्यास,

रासासिंह रावत, सौभाग्यसिंह शेखावत, पृथ्वीराज रतनू, अब्दुल वहीद कमल अर राजस्थान रा मोकळा विधायक, साहित्यकार अर भणेशरी पूग्या ।

● लोकसभा अर राज्यसभा में भी राजस्थानी भाषा नै आठवीं अनुसूची में जोड़ण रौ मुद्दौ केई बार उठ्यौ तो केई बार सरकारू अर निजू विधेयक राखीज्या । महाराजा डॉ. करणीसिंह, महाराजा गजसिंह, गुमानमल लोढा, लक्ष्मीमल सिंघवी, ओंकारसिंह लखावत, रासासिंह रावत, नाथूराम मिर्धा, गिरिजा व्यास, बालकवि बैरागी, सरला माहेश्वरी, श्योपतसिंह, अर्जुनराम मेघवाल, देवजी पटेल, डॉ. कर्णसिंह, डॉ. बलराम जाखड़ अर दक्षिणी राज्यां रा सांसदां इण मुद्दौ नै केई बार उठ्यौ । डॉ. करणीसिंह 14 मार्च 1966 अर 16 फरवरी 1968 में दो बार राजस्थानी भासा नै आठवीं अनुसूची में जोड़ण सारू निजू विधेयक राख्या, पण पास नीं होया । 1967 में अर 1998 में दो बार डॉ. लक्ष्मीमल सिंघवी भी इण सारू निजू विधेयक राख्यौ । सरकारू विधेयक ई आया, पण राजस्थानी नै विधेयकां सूं टाळीजतो रैयौ ।

● राजस्थानी भासा नै संविधान री आठवीं अनुसूची में जोड़ण अर राज्य री दूजी राजभासा बणावण री मांग नै लेय 'र समूळै देस में न्यारै-न्यारै मंचां सूं अर न्यारा-न्यारा संगठनां सूं मांग होवती रैयी । इण समूळै आंदोलन नै अेक मंच माथै लावण सारू 1994 में अखिल भारतीय राजस्थानी भाषा मान्यता संघर्ष समिति री थरपणा करीजी । इण री थरपणा में लक्ष्मणदान कविया, डॉ. राजेन्द्र बारहठ, डॉ. भरत ओला अर हनुमानगढ़ जिलै रै साहित्यकारां री खासा भूमिका रैयी । इण समिति रा संस्थापक अध्यक्ष लक्ष्मणदान कविया अर महामंत्री डॉ. राजेन्द्र बारहठ बण्या । इणरै बाद भरत ओला, दारासिंह स्याग, हरिमोहन सारस्वत अर के.सी.मालू इण रा अध्यक्ष थरपीज्या । डॉ. राजेन्द्र बारहठ सरू सूं अब ताई महामंत्री है । इण समिति रै नीचै आंदोलन पेटै भोत काम होया । पैलडौ सांतरौ काम इण री हर जिलै में इकाई रौ गठन अर मोट्यारां, लुगायां, भणेशर्यां अर बुद्धिजीवियां री न्यारी-न्यारी कमेट्यां जिलैवार बणी अर अनुसासित तरीकै सूं काम करीज्यौ । इण समिति 3 अक्टूबर 2000 नै नोहर सूं हनुमानगढ़ ताई 90 किलोमीटर री मोटर साईकिल रैली काढ 'र हनुमानगढ़ में बडौ जळसो कर्यौ अर पछै प्रधानमंत्री रै नांव कलक्टर नै ग्यापन दियौ । समिति रा उण बगत रा अध्यक्ष भरत ओला रै नेतृत्व में 3 मार्च 2003 नै विधानसभा माथै धरणौ दिरीज्यौ । धरणै में सामळ होवण सारू सगळै जिलां सूं बसां भरीज भरीज 'र आई । इण धरणै री गूज विधानसभा में उण बगत होई जद विपक्ष रा उपनेता डॉ. रामप्रताप धरणै सूं उठ 'र विधानसभा में राजस्थानी भासा री मानता री मांग पेटै ध्यानाकर्षण प्रस्ताव राख्यौ जिण माथै लंबी चरचा होयी । इणी धरणै रै कारण 25 अगस्त 2003 नै राजस्थान विधानसभा में राजस्थानी भासा नै संवैधानिक मानता सारू संकळप-प्रस्ताव सर्वसम्मति सूं पास होयौ । समिति रा अध्यक्ष दारासिंह अर हरिमोहन सारस्वत री अध्यक्षता में 8 फरवरी 2005 नै गंगानगर सूं दिल्ली ताई री अेक राजस्थानी जनचेतना रथयात्रा निकाळीजी

जकी राजस्थान रा सगळा जिलां में पूग-पूग जळसा कर्या अर पळै दिल्ली में उपराष्ट्रपति अर गृहमंत्री नै मानता बाबत ग्यापन दियौ। इण यात्रा में रामस्वरूप किसान, दारासिंह स्याग, हरिमोहन सारस्वत, सत्यनारायण सोनी, अलीमोहम्मद पडिहार, मनोज स्वामी, प्रह्लादराय पारीक, विनोद स्वामी अेक महीनै ताई साथै बग्या। यात्रा रौ जाग्यां-जाग्यां सुवागत होयौ। समिति री अब अंतरराष्ट्रीय इकाई भी थरपीजगी जिणरा अध्यक्ष न्यूयार्क राना रा प्रेम भंडारी है। इण संघर्ष समिति री जिला ईकायां ई सांतरौ काम कर रैयी है। हनुमानगढ़ जिलै रै परलीका गांव अर नोहर में मायड़ भासा मानता पेटै आए दिन कोई न कोई काम होंवतौ रैवै तो हनुमानगढ़ जिलै में ओम पुरोहित कागद अर मोट्यार परिषद रा प्रदेश संयोजक अनिल जांदू रै नेतृत्व में जिलै रै 1917 गांवां में 'म्हारी जुबान रो खोलो ताळो' पोस्टकार्ड लिखौ अभियान चलाईज्यौ। इण अभियान में राष्ट्रपति, प्रधानमंत्री, गृहमंत्री अर सांसद रै नांव कोई 6 लाख पोस्टकार्ड लिखीज्या। पोस्टकार्ड लिखण में पंजाबी समाज, सिक्ख समाज, अरोड़ा समाज अर सिंधी समाज भी बढ-चढ रै भाग लियौ। इणी भांत रौ अभियान जोधपुर रा संभाग पाटवी चंदनसिंह भाटी रै नेतृत्व में बाड़मेर अर जैसलमेर जिलां में चलाईज्यौ अर लाखां पोस्टकार्ड लिखीज्या। बाड़मेर में मानता सारू ई रगत सू कागद लिखण रौ सांतरौ अभियान चलाईज्यौ।

●
अखिल भारतीय राजस्थानी भाषा मान्यता संघर्ष समिति दिल्ली सरकार माथै दबाव बणावण सारू लगोलग ग्यापन देय रैयी है अर दिल्ली में इणी साल अेक लूँठौ जळसौ भी कर्यौ है। बाड़मेर, नागौर, पाली, जोधपुर, बीकानेर, उदयपुर, बांसवाड़ा, नाथद्वारा अर अजमेर में भी जनजागरण सारू लूँठ जळसा तेवड़्या। मायड़ भासा दिवसां माथै सगळै जिलां में हर साल धरणा लगाईजै अर ग्यापन ई दिरीजै। प्राथमिक शिक्षा राजस्थानी में नीं देवण, टैट में अर आरअेअेस परीक्षा में राजस्थानी नै सामल नीं करण रै विरुद्ध समिति कानी सू सगळा जिलां में प्रदरसन कर्या, धरणा दिया अर सरकार नै ग्यापन दिया। राजस्थान विधानसभा सू पारित संकळप प्रस्ताव माथै केंद्र सरकार कानी सू लारलै 10 सालां सू कोई कार्रवाई नीं होवण रै विरोध में सगळै जिलां अर गांव-गांव सू मुख्यमंत्री रै नांव ईमेल करीज रैया है। समिति रा संस्थापक लक्ष्मणदान कविया, अध्यक्ष के. सी. मालू, महासचिव डॉ. राजेन्द्र बारहठ, सचिव डॉ. सत्यनारायण सोनी, प्रदेश प्रचार प्रभारी विनोद स्वामी अर अंतरराष्ट्रीय पाटवी प्रेम भंडारी राजस्थानी भाषा री मानता सारू सगळै स्तरां माथै काम अर सम्पर्क कर रैया है तौ मातृभासा राजस्थानी छात्र मोरचा रा पाटवी डॉ. अशोक गहलोत, गौतम अरोड़ा, सतपाल खाती अर गौरीशंकर कुलचंद्र प्रदेश भर रा भणेसत्यां में मायड़ भासा री अलख जगाय रैया है।

❖❖

24-दुर्गा कोलोनी

हनुमानगढ़ संगम-335512 (राज.)

मो. 9001325208

राजस्थानी भासा री मान्यता रौ सवाल

डॉ. आईदानसिंह भाटी

जद ई किणी भासा बाबत बात चालै तौ म्हनै अचाचूक रवीन्द्रनाथ चेतै आवै। वां बाळपणै रै अेक संस्मरण रै मार्फत मातृभासा रौ महत्त्व समझायौ है। आखै जगत रा चिंतक मातृभासा मांय शिक्षा रौ महत्त्व मानै। भारत री ख्यातनांव चिंतक रमणिका गुप्ता वडोदरा (गुजरात) में होयै 'भासा रिसर्च अंड पब्लिकेशन सेंटर' रै अेक सम्मेलण रौ हवालौ देवता थकां कैयौ है कै, "आपां रै देस में 1961 री गणना अभिलेख रै आधार माथै 1652 मातृभासावां है अर दुनिया में बोलीजण वाळी लगैटगै आठ हजार भासावां मांय सू लगैटगै नब्बै फीसदी भासावां 2050 ई. ताई विलाईज जावैला।" आगै रमणिकाजी कैवै, "आं भासावां रै लुप्त होवण रौ अेक लूठौ कारण है, आदिवासी खेत्रां मांय कुकुरमुतां री भांत अंग्रेजी माध्यम री स्कूलां रौ खुलणौ। इण सू ई आदिवासी भासावां री हाण होय रैयी है।"

म्हें अटै अवेस करने मातृभासावां रौ मुद्दौ उठायौ है, जिणसूं कै जीवण में मातृभासा रौ महत्त्व जाण्यौ जाय सकै। म्हें के कोई पण समाजचेता राजस्थान री मातृभासा हिंदी नै नीं मानैला। राजस्थानी भासा बाबत पैली अैतिहासिक भूल आ होयी कै पुरुषोत्तमदास टंडन, नेहरूजी आद राजनेतावां री बात में आयनै राजस्थान रा तत्कालीन राजनेतावां मातृभासा री बळी चढाय दी। दक्षिण भारतीय लोगां रै हिंदी विरोध री बातां बणायनै, हिंदी रौ उण बगत समर्थन करणै अर पछै राजस्थानी नै मान्यता री बात कैयनै राजस्थान रा वासिंदां नै जिण आंधी गळी में धकेलीज्या, उणरी सजा म्हे आज लग भुगतां हां।

मातृभासावां रै मुद्दौ माथै म्हें अटै चावा-ठावा भासाविद सुनीतिकुमार चाटुर्ज्या रौ वक्तव्य मांडणौ मुनासिब समझूं, जिणसूं प्रांतीय भासावां अर बोलियां रौ महत्त्व थापित होवै है, "प्रांतीय भासावां रै पुनरुद्धार सू हिंदी रौ आंतरप्रादेसिक महत्त्व किणी तरै कम नीं व्हे सकै। पच्छाही रा लोगां जरूर हिंदी रौ थोड़ौ-घणौ पसराव करियौ है अर टूटी-फूटी व्याकरण-भ्रस्ट हिंदी नै अंगेजनै पच्छाही रै आसै-पासै रा लोग हिंदी नै भारत री राष्ट्रभासा बणायी है, पण राष्ट्रभासा कै आंतरप्रादेसिक भासा मांय अर घरेलू टाबरां री शिक्षा री बोली कै प्रांतीय कामकाज री बोली में घणौ फरक है। मातृभासा रै सिवाय किणी पण दूजी भासा मांय मिनख रै हियै रा

भावां रौ पूरौ-पूरौ प्रकास नीं व्हे सकै अर जद ताई मिनख साहित्य में आपरौ पूरौ प्रकास नीं कर सकै, तद ताई वौ जकौ साहित्य बणावण री आफळ करै, उण मांय मोकळी व्यर्थता आय जावै। श्री तुलसीदासजी अर विद्यापति जकौ कीं लिख्यौ— आपरी मातृभासा में ईज लिख्यौ, इण वास्तै ईज भारतीय-साहित्य रै बाग में विद्यापति रा पद अर तुलसीदास रौ 'रामचरितमानस' हर तरै सू सफळ सू सफळ रचना होय र घणी सू घणी लोकप्रिय होय सकी अर जन-जन री जीभ माथै सोरै सांस ठौड़ पाय सकी। भारत में इण बगत 15 मुख्य भासावां चालू है। प्रांतीय बोलियां री तौ गिणत ई नीं करी जाय सकै। आं मुख्य कै साहित्यिक भासावां मांय 11 भासावां उत्तर भारत री गिणीजै अर चार दक्षिण भारत री। आं रै टाळ कीं अैड़ी भासावां ई है जकी आज साहित्यिक महत्त्व री अधिकारणी तौ कोनी, पण प्राचीन काल में वारौ साहित्य उच्च कोटि रौ हौ अर वारी संतानां रै हिंयै री सगळी बातां वां ईज भासावां में प्रगट होवती ही। राजस्थानी अर मैथिली— दूजी बोलियां रै सागै आं दो भासावां रै निकेंद्रीकरण री बात आज हिंदी संसार में लाईजी है। 'हिंदी प्रांत' मांय जकी बोलियां फगत घर अर सीमित प्रांत में काम मांय लिरीजै, वां बोलियां रा दो जबरदस्त अर नामी वकील हिंदी साहित्य खेत्र में पधास्था है। वां मांय सू अेक है श्री बनारसीदास चतुर्वेदी अर दूजा है श्री राहुलजी सांकृत्यायन। भासा तात्त्विकी दीठ सू म्हारी राय आ है जटै साच्याणी व्याकरण रौ फरक दीसै— जटै प्राचीन साहित्य रैवण रै कारण प्रांतीय बोली सारू उपरै बोलण वाळां मांय अभिमानबोध होवै अर जटै प्रांतीय बोली बोलण वाळा टाबरां अर उमरवान लोगां नै हिंदी अंगेजण में अबखायी होवै, बटै अैड़ी प्रांतीय बोली री शिक्षा अर प्रांतीय कामकाज में लावण रौ सवाल आय सकै। जटै ताई म्हां देखां हां, व्याकरण री दीठ सू राजस्थानी— खड़ी बोली हिंदी सू अलग है। राजस्थानी जनता मांय आपरै प्राचीन साहित्य सारू अेक नवी चेतना पण दीसै है। ...राजस्थानी रा प्राचीन साहित्य बाबत कीं कैवण री जरूरत नीं है। जे तथाकथिक 'हिंदी साहित्य' सू राजस्थानी में लिख्योड़ौ साहित्य काढ दियौ जावै, तौ प्राचीन हिंदी साहित्य रौ गौरव किंतौ ई घट जावैला। चंदबरदाई सू पैली रै बगत में अर उपरै पछै राजस्थानी रा जिता कवि होया है, वां माथै ज्यूं-ज्यूं उजास नांखीजै, त्यूं-त्यूं म्हांरौ इचरज अर आपंद बध जावै। फगत राजस्थानी बोलण वाळां नै ईज इणरौ गौरबौ नीं है, बल्कै आखै भारत नै इणरौ गौरव है। इण गौरव रै कारण जे राजस्थानी लोग आपरी मातृभासा रौ पुनरुद्धार कै पाछी थापना करणी चावै, तौ इणमें रीस मानण री कै अपरोगी बात नीं है। भारत री खास-खास 15 भासावां मांय जे राजस्थानी जैड़ी दो-च्यार भासावां थापित व्हे जावै, तौ इणमें आसंका अर डर वाळी कोई बात नीं है। राजस्थानी लोग आपरी मूर्च्छित-सी आतमा नै फेरुं सजग कै सचेत करणी चावै, तौ इणसूं आखै भारत नै लाभ पूगैला, अर राष्ट्रीय अेकता री ई कोई हाण नीं होवैला।'' (श्री सुनीतिकुमार चाटुर्ज्या, भारतीय भासातत्त्व रा आचार्य, कलकत्ता विश्वविद्यालय, 11.2.1944)

अटै आ बात पण घणी महताऊ है कै सुनीतिकुमार चाटुर्ज्या रौ औ वक्तव्य आजादी सू पैली रौ है। इण वक्तव्य सू पैलां फ्रेंच विद्वान गार्सा द तासी आपरै ग्रंथ 'इस्तार द ल लितरेत्यूर ए ऐं ऐंदूस्तानी' अर सर जार्ज ग्रियर्सन 'लिंग्विस्टिक सर्वे ऑफ इंडिया' मांय राजस्थानी रौ प्रामाणिक भासा वैग्यानिक विस्लेसण कर चुक्या हा। राजस्थानी भासा री जिण बोलियां रौ

वितंडौ बणायनै राजस्थानी नै अेक भासा रै रूप में खारिज करण री आफळ करीजै है, वै ईज बोलियां भासावां रौ प्राण व्हिया करै। सर जार्ज ग्रियर्सन रै 'लिंग्विस्टिक सर्वे ऑफ इंडिया' मांय तौ आज रै मध्यप्रदेस री माळवी अर हरियाणा री बांगरू ताई राजस्थानी भासा री बोलियां है। बोलियां सूं भासावां सिमरध होवै, जे तेलुगु 36, कन्नड़ 32, मलयाळम 14, कोंकणी 15, तमिल 22, नेपाली 6, गुजराती 27, पंजाबी 29, बंगाली 15, उड़िया 24, अंग्रेजी 57 अर हिंदी 43 बोलियां रै होवता थकां ई अेक भासा है तौ 73 बोलियां वाळी राजस्थानी आं सगळं सूं सिमरध भासा है।

भासा वैग्यानिकां मांय अेक खांतीलौ नांव है— प्रो. ज्यूल ब्लॉख। वां रौ ग्रंथ 'ल आँ दो एरिया' मांय वै श्री सिलवेंलेवी ए. मेइए अर श्री टर्नर जैड़ा भासा सास्त्रियां रौ इण वास्तै आभार मानै कै, "भासा री प्रामाणिकता सारू बोलण वाळं री संख्या कोई महताऊ इकाई नौ है, हालांकै औ रोचक तत्त्व होय सकै है।" वै आगै लिखै, "आधुनिक भासावां री रोचकता वांरै संख्या सूचक महत्त्व सूं घणी इधकी है। उणरै साम्हीं वां भासावां रै जाणण री अठै जरूरत नौ है, जिणां रौ अमूमन वरणन करियौ जावै, हालांकै वां मांय कींअेक री गणना संसार री बडी-बडी भासावां में करी जावै। व्यापक अरथ मांय हिंदी री उणमें छठी ठौड़ है, फ्रांसिसी रै मुकाबलै बंगाली सातवीं ठौड़ माथै आवै, बिहारी तेरवें, मराठी उगणीसवें, पंजाबी, राजस्थानी, उडिया लगोलग बाईसवें, पच्चीसवें अर अठाईसवें स्थान माथै।" (पृ. 19-20)

सोझीवान पाठकां नै विचार करणौ चाईजै कै भासा-वैग्यानिक राजस्थानी नै संसार री बडी-बडी भासावां में गिणावै है अर लाल बुझक्कड़ राजस्थानी विरोधी आंख्यां मींच्या प्रळाप कर रैया है... 'राजस्थानी कैड़ी?' 'इण में तो बोलियां है?' तुलसीदासजी अैड़ा लोगां सारू लिख्यौ है— 'मूंदहुं आंख कतहु कछु नाहिं।'

कुणसी बोली किण भासा री है कै अेक भासा री बोली किणी दूजी भासा रै नैड़ी कियां पूगै, औ ई भासा वैग्यानिक तथ्य है। भासावां री सीमावां अर वां रै अंतःसंबंधां नै लक्षित करनै सर जार्ज ग्रियर्सन घणी पैल करै, "भासावां री सीमावां कृत्रिम मिश्रण सूं छिप जावै, बदळाव अमूमन होळै-होळै होवै, जिणरौ मतळब है, दो न्यारी भासावां अंतरां वाळी भासावां री श्रेणी में आय जावै, तौ इणसू किणी नै अचरज नौ होवणौ चाईजै, विचारजोग है, कांई भोजपुरी आपरै अगूण कै आथूण री सींवां सूं संबंधित है? कच्छ री भासा कांई सिंधी है कै गुजराती?" (प्रो. ज्यूल ब्लॉख— भारतीय आर्य भाषा)

सर जार्ज ग्रियर्सन रौ औ दाखलौ म्हें इण सारू दियौ है ताकै अणजाण लोग बोलियां रै वितंडै नै समझ सकै। जका लोग राजस्थानी नै फगत मारवाडी समझै है, स्यात वै ग्रियर्सन री बात सूं बोलियां रौ मरम समझ जावै। ग्रियर्सन कच्छी बोली माथै सिंधी रै प्रभाव नै परिलक्षित कर रैया है, जकी कै आज गुजराती रौ महताऊ अंग है। आज मेवाती माथै भलां ई ब्रज रौ असर हुवै, कै वागड़ी माथै गुजराती रौ प्रभाव मिळै, पण सर जार्ज ग्रियर्सन रै मत मुजब वै आपरी मूळ भासा राजस्थानी री बोलियां ईज मानीजैला। सुनीतिकुमार चाटुर्ज्या जिण राजस्थानी अर मैथिली नै अेक ईज स्तर पर राखी ही, वा मैथिली राजनीतिक प्रभाव सूं संविधान री आठवीं अनुसूची मांय पूरण भासा रौ दरजौ हासल कर चुकी है। कोंकणी ई मराठी सूं न्यारी

होय'र आठवीं अनुसूची मांय पूरण भासा बण चुकी है, पण बारला तत्वां रै हस्तक्षेप अर राजस्थान रा राजनेतावां री उदासीनता रै चालतां राजस्थानी समाज आपरी भासा री मान्यता सारू संघर्ष कर रैयौ है। हरेक भासा री अेक केंद्रीय उपभासा कै बोली होवै है जकी संपर्क भासा री रूप ग्रहण कर्या करै। इण संपर्क भासा रै विगसित होवण रा केई कारण होया करै। खड़ी बोली नै ई जिण भांत दूजी बोलियां स्वीकारी है, राजस्थानी ई पक्कायत अेक संपर्क भासा रै रूप में विगसित होवण री प्रक्रिया में है। राजस्थान में विश्वविद्यालयां मांय आ पढाई जावै, आकासवाणी अर स्वतंत्र न्यूज चैनलां माथै समाचार जिण राजस्थानी में पढाया जावै, साहित्यिक पत्र-पत्रिकावां में जिण भासा मांय लेखन होवै है, वौ ईज तौ उणरौ संपर्क रूप है। हिंदी रा अंतरराष्ट्रीय ख्यातनांव मनीषि प्रो. नामवरसिंह अनेक मंचां सूं आ बात कैयी है कै राजस्थानी नै संविधान री आठवीं अनुसूची में सामल करनै उणनै पूरण भासा री मान्यता मिलणी चाईजै। वां बाड़मेरे मांय अेक साक्षात्कार मांय औ पण कैयौ हौ कै आ राजस्थान रा लोग तय करैला कै वारी संपर्क भासा कुणसी बोली होवैला ? आजकाल जका लोग मारवाड़ी नै राजस्थानी कैवै है वै प्रकारांतर सूं संपर्क बोली कानी संकेत कर रैया है।

ओम पुरोहित 'कागद' रै सबदां में कैवू तौ "आपरे टाबरां री जबान काट'र राष्ट्र रै चरणां में राखी ही राजस्थानियां।" बोलियां अर विभिन्नतावां री बात कैवणिया वौ तत्व है, जका नीं तौ भासाविद है अर ना ई समाज-चिंतक। अै लोग समै-समै पर अखबारां अर मीडिया रा चंद लोगां रै मार्फत राजस्थानी रै विरोध रा सुर रंग्योडै सियाळियां री तरजां माथै उछाळै, पण जनता अजै आनै ओळख नीं सकी है। राजनेता वारी चिरळाट अर गीदड़ भभकियां मांय आय जावै अर बेतुकै बयानां सूं राजस्थानी समाज नै बरगळाय रैया है। कीं बरसां पैली अेक अखबार अेक विमर्श चलायौ, जिण मांय राजस्थानी विरोधियां नै प्रमुखता दीन्ही। हां, राजस्थानी समर्थकां रा मतां नै ई छापीज्या। राजस्थानी विरोधियां रै मतां में 'इस तरह तो हिंदी परिवार बिखर जाएगा', कै 'शांत प्रदेश कहीं जलने न लग जाए' जैड़ा भावुक वक्तव्य दिरीज्या हा अर विमर्श बिना किणी नितार रै खतम करीजयौ। अठै आ बात उल्लेखजोग है औ वौ समै हौ जद राजस्थानी री मान्यता री बात केंद्र मांय सिरै चढ्योड़ी ही। इण भांत विरोध रै इण होव्वै सूं मान्यता री बात टळगी।

राजस्थान राज्य अभिलेखागार रै रिकार्ड सूं आं तथ्यां री पुष्टि होवै है कै रजवाड़ां री बगत राजकाज, शिक्षा, हुंडी, पट्टा-परवाना अर दूजा कामकाज राजस्थानी भासा में ईज होवता हा। रजवाड़ां रौ औ स्थान राजस्थानी भासा रै कारण ईज राजस्थान बाज्यौ। सिंधी, नेपाली आद भासावां री मान्यता मांय राज्यां रौ लफड़ौ नीं हौ, पण राजस्थानी सारू राज्य विधानसभा मांय मान्यता रौ प्रस्ताव पास करावणौ जरूरी होयग्यौ। राजनेता इणनै टरकावता रैया। जद डॉ. सोनाराम बिश्नोई राजस्थानी भासा, साहित्य अर संस्कृति अकादमी बीकानेर रा अध्यक्ष हा, तद 2002 रै अकादमी रै वार्षिकोत्सव मांय तत्कालीन मुख्यमंत्री अशोक गहलोत गांधीवादी मूल्यां मांय आस्था राखण रै कारण नेमीचंदजी जैन 'भावुक' अर डॉ. सोनाराम बिश्नोई सूं कैयौ कै लगैटगै संसार री सगळी भासावां मांय गांधीजी री आतमकथा रौ अनुवाद होय चुक्यौ है। जे अकादमी इण काम नै कर देवै तौ म्है राजस्थानी भासा री मान्यता रौ

संकल्प राजस्थान विधानसभा सूं पारित करवाय देवूला । नेमीचंदजी जैन 'भावुक' अर डॉ. सोनाराम बिश्नोई इण बात नै गंभीरता सूं ली अर भावुक साब गांधीजी री आतमकथा री पड़त डॉ. सोनारामजी नै देय दीन्ही । औ फगत अेक संजोग हौ कै डॉ. बिश्नोई अर म्हारा मित्र दलपत परिहार रै कैवण सूं म्हें वौ काम अेक तै समै मांय पूरौ कर दियौ अर उणरौ लोकार्पण जोधपुर रै गांधी भवन में गांधी जयंती माथै बरस 2002 में खुद मुख्यमंत्री अशोक गहलोत करियौ । आपरै मुख्यमंत्री रैवण रै उण काळ में राजस्थान विधानसभा रै आखरी सत्र रै आखरी दिन मुख्यमंत्री अशोक गहलोत शिक्षामंत्री डॉ. बुलाकीदास कल्ला सूं राजस्थानी भासा री मान्यता रौ संकल्प प्रस्ताव रखवायनै विधानसभा मांय ध्वनि-मत सूं पारित करवायौ । (औ ई अेक संजोग हौ कै म्हनै इण अनुवाद माथै साहित्य अकादेमी नई दिल्ली रौ 2006 में अनुवाद पुरस्कार मिल्यौ ।) मान्यता री दड़ी अबै दिल्ली रै पाळै मांय है । तत्कालीन मुख्यमंत्री अशोक गहलोत अर शिक्षामंत्री डॉ. बुलाकीदास कल्ला तौ आपरी मातृभासा रौ रिण चुकाय दियौ । अबै मान्यता री बात विकास-पुरुसां रै पाळै मांय है । अेक राष्ट्र, अेक भासा, अेक धरम री बात कैवण वाळ्यं नै मातृभासावां री मैकती विविधरूपा फुलवाड़ी किती भावैला, औ तौ भविस ईज बतावैला ।

राजस्थानी भासा री मान्यता रौ सवाल आधै सईकै सूं साहित्यकार उठाय रैया है, पण अबै उणसूं युवा वरग अर जनता जुड़ण लागी ही कै अचाचुक बजारू दल्ला बीच में आय टपक्या है जका घणी चिंता रौ विसै है । समरपित लोग, जका राजस्थानी री मान्यता री आवाज नै बुलंद करी ही, वै आज खुद नै उपेक्षित मैसूस कर रैया है । युवा लोग बजारू दल्लां री चालबाजियां नै समझ नीं रैया है । मूल्य विहूणता रै इण दौर मांय मान्यता रौ सवाल 'नक्कारखानै मांय तूती' बण 'र रैयग्यौ है । राजनीतिक इच्छा-सगती रौ अभाव अर आंचळिक मुद्दा में उळ्ळयोड़ा राजनेतावां सूं सारथकता अर मूल्यवान पहल री उम्मीद करणी अपणै आपनै धोखौ देवणौ है । राजस्थानी संस्थानां सूं जुड़योड़ा बिकारू लोगां रौ चरित्र साव व्यक्तिवादी अर स्वारथी सिद्ध होय चुक्यौ है । शिक्षाविद 'कागलै' सूं 'क्रों' नै महताऊ सिद्ध करण में लाग्योड़ा है, वारी दीठ में चकाचौंध बजार है, वैश्विक सुपना है, बजारू टुकड़ां माथै पळण वाळी राजनीति धरतीपुत्रां रौ दरद नीं जाणै, वा मातृभासा री पीड़ काई पिछाणैला ?

❖❖

8 बी/47, तिरुपति नगर, नांदड़ी
जोधपुर (राजस्थान) 342015
मो. 09414325867

● गीत

मायड़ भासा राजस्थानी

डॉ. बस्तीमल सोलंकी भीम

किरोड़ा कंठां में गूजे, मायड़ भासा राजस्थानी।
कुण नीं जाणै इणनै, आ मीठी इमरत वाणी॥

रूड़ा रूपाळा दूहा छंद, घणा रासा अर ख्यातां।
इणरी मरोड़ जगचावी, मन मोवै कथावां बातां॥
उधारी बोली क्यूं बोलां, क्यूं मेलां जीभ अडाणी।
कुण नीं जाणै इणनै, आ मीठी इमरत वाणी॥

सोनै सो इतिहास मंड्यौ, भर्यौ पूर साहित भंडार।
इणरौ रुतबौ है ऊंचौ, सुस्सत री वीणा रा तार॥
जग में स्यान सवाई राखै, वीर भू री वीरवाणी।
कुण नीं जाणै इणनै, आ मीठी इमरत वाणी॥

मीरां री मायड़ भासा, होतां पूत बणी निपूती।
कवियां री कलम जगावै, कद जागैला जनता सूती॥
घणी रची सतसईयां इणमें, आ मोटी धणियाणी।
कुण नीं जाणै इणनै, आ मीठी इमरत वाणी॥

अै शकुनी रा भरमाया, कद निज मायड़ नै पूजी।
मायड़ भासा में मांगै वोट, पण जीत्यां पछै बोली दूजी॥
थोथा भासण झूठी दिलासा, नेतावां री आदत पुराणी।
कुण नीं जाणै इणनै, आ मीठी इमरत वाणी॥



राजस्थान साहित्य चिंतन परिषद्
मु. पो. भीम-305921, जिला-राजसमंद (राज.)

● कहानी

मेळौ

राजेन्द्र शर्मा 'मुसाफिर'

“लारली बरियां गोगैजी रा अेक सू अेक इधका सोवणा निसांण हा। पण यार, आपरलौ इत्तौ जोरगौ कोनी हौ।”

“आपरली मेड़ी रौ निसांण ई कमती तौ कोनी हौ भाईड़!”

“थनै ठाह ई कोनी साचला निसांण कैड़ा हुवै! निसांण साथै भगतां रै हाथां अर गळै मांय भांत-भंतीला सांप! केई जणां रै हाथां सांकळां रा झूमका! सांकळां नै घुमा-घुमायनै डील माथै पटकै। अे सगळा आपरै साथै हा के?”

“म्हनै अेक दो जणां रै हाथां में पतळी जेवड़्यां-सी चेतै तौ आवै...।”

“काळा नाग तौ कोनी हा नीं... अर अबकै ई आपणै तौ बांसड़े नै फगत गाभा-लत्ता सू सजायनै निसांण त्यार कर लीन्हौ। म्हनै तौ जाबक ई सोवणौ कोनी लाग्यौ। आपरलौ जवांन भगत तौ खुद ई सांपां सू डरै। हाथां मांय सांपला लेय लेवै तौ पजामौ सूगलौ करदै! निसांण तौ थूं देख्या ई कठै है। आपां आज देखस्यां...।”

“पण रिपिया-पईसा मिल्या हुवै नीं! बापू नै प्लास्टिक अर काच री बोटलां रा रिपिया नीं देवता तौ अबै काम आवता। अब कद तौ चुगनै ल्यावां अर कद बेचां? बगत ई नीं रैयौ। मेळै मांय मां रै साथै जायां मावड़ी तौ कीं नीं दिरावैली। आपां निरवाळा ई जास्यां। ढोल, पीपाड़ी, लांप अर कचकड़ै वाळी मोटर लियां ई पच्चीस-तीस रिपिया तौ लाग जासी, खास्यां के?”

“भाया, चायै कीं हुय जावै, मेळै खातर अबकै कम सू कम पचास रिपिया लेस्यां।”

“पचास सू पार कोनी पड़ै...। वौ डोलर-हींडौ अर चकरी री सवारी...!”

“म्हें तौ कालै बापू सू चटीड़ खाया ई हा। थूं ई पितवांण कर दखां। बापू रै अबकै कड़की है, पईसां रै नांव सू ई चिणखौ लागै। म्हें तौ कीं नीं मांगूं। आज थूं मां सू मांगलै, स्यात मां देयदै! चाल मांयनै चालां।”

आज गोगा नवमी है, धुर-मेड़ी रै ताळ मैदान मांय जबरौ मेळौ घलै। वठै जावण रौ चाव नेन्हा-मोटा सगळां नै रैवै। दिनुगै पैली घर री देवळी माथै बैठ्या चवदै-पंदरा बरस रा दो

भाई गोगोजी रै मेळै जावण री बतळावण करै हा। मेळै पेटै वारौ कोड नावडै नीं हौ। पण बिना परईसां मेळै जावणौ किणविध हुवै ?

“मां, आज गोगोजी रौ मेळौ भरसी। थूं ई तौ मेळै जासी नीं। म्हें निरवाळा, अकला ई चल्या जावां के ?”

“दिनुगै पैली थारै मांय गोगोजी बडग्यौ के ? काम रा न काज रा, दुसमीं अनाज रा ! सिंझ्या पडै म्हारै साथै ई चाल्या।” मां बूंदी बांधती थकी पडूतर दीन्हौ।

“मां, म्हे दोनू जणां आपू-आप चल्या जासां, म्हानै रिपिया देयदै।” छोटकियौ छोरौ मां रै कनैसीक लागनै बोल्यौ।

“म्हनै काम करण दै, माथौ मतना खा। आज ई बूंदी नक्की करनै लीलगर नै गाभा पूठा देवणा है।”

“मां, थूं काम कर लेयी, पण परईसा तौ देयदै, म्हें दोनू आपूआप मेळै चल्या जासां।”

“सिंझ्या नै देसूं, नीतर थारौ बापू आय जावै, वीं सूं मांग लेयी।”

“मां, म्हनै अबकी-अब देदै, बापू तौ सिंझ्या पडै आसी।”

“थनै सौ बरियां कैय दीन्हौ सुणै कोनी के, बोळा लट्ट ! म्हारौ लोही मतना पी, दोनू जणा बापू कनै जावौ परा।”

“मां, बापू कोनी देवै। कालै ई परईसां रै नांव सूं चूनियै रै सपीड घाल्या।...थनै ठाह है नीं ! फेर ई थूं बापू कनै जावण खातर कैवै।”

“म्हनै ठाह है, जदई कैवूं मरज्याणा ! चूनियौ बोलबालौ बैठ्यौ है कै नीं ? थूं ई बोलबालौ पड्यौ रे, नीतर म्हें ई कनपटी तळै मेल द्यूंगी। अठैई पीपाड़ी बाज जावैली। परईसां री लाय लाग रैयी है दिनुगै पैली ! म्हारै कनै धेलौ ई कोनी।”

“मां, राधियौ अर म्हें दोनू कालै ई पूठा देय देस्यां, बोटलां बेचनै...। अकर देयदै, थारली पेई मांय सौ-पचास तौ मिल जासी।...क्यूं काठी हुवै !”

“मर-मरज्याणा ! अबे थूं ई बकै लाग्यौ, कालै री ई चेतै कोनी थनै ? म्हारी पेई रौ नांव लियौ है तौ सूंत नाखूंली... आ कामड़ी दीसै है नीं ! खायग्या म्हनै जीवती नै ई... परै जावौ हौ कै गदीड पड्यां मानसौ ? पूठा देवण रौ कौल न्यारौ करै मरीलियौ !” अबकै जीवणी खासी रीसाणी हुयनै छोरं नै दकाल्या।

दोनू जणा दांत दिखावता पूठा दरूजै सांम्ही देवळी माथै बैठग्या। गळी मांय अणूतौ सगलवाडौ ! असवाडै-पसवाडै कादौ-कीच। पाणी निकासी सावळ नीं हुवण रै कारण इण बास मांय बारामासी पाणी भर्यौ रैवै। नीची जात रै वासींदा रा लगैटगै चाळीस घर। घणकरा मजूरी करनै पेट लिवाड़ी करणियां। रोजीना कूवौ खोदनै पाणी पीवणिया। बास रै सांकडै ई सरकारी पोसाळ जकी मांय अडै टाबरं रा नांव चालै पण पोसाळ जावणिया गिणती रा ई है। औ बास ई अक कॉलोनी रै नांव सूं जाणीजै। चाय री दुकानां मांय गिलास धोवणिया, गळी-मोहल्ला मांय कूटळौ चूगणिया कै फेर पुराणा अखबार, लोह-लक्कड खरीदण वाळा टाबर इण

कॉलोनी रा है। कॉलोनी रै चिपती थकी पईसां वाळां री लगैटगै हजार घरां वाळी कॉलोनी। कटै राजा भोज अर कटै गांगलौ तेली! आभै अर जमीं रौ आंतरौ, औ आंतरौ तौ कदैई मिट नीं सकै। पण दोनू कॉलोनी रा वासिंदा अेक-दूजै रा मूंडा तौ देखै ई है। जियां आभौ अर जमीं अेक दूजै सू मूंडौ नीं फेर सकै बियां ई दोनू कॉलोनी रा मिनख अणचाया आंम्ही-सांम्ही तौ हुवता ई रैवै।

इण भांत री बसावट हुयगी तौ हुयगी। मोटोड़ी कॉलोनी मांय घणकरा बिचलै वरग रा है, केई बेसी अमीर। मोटोड़ी कॉलोनी मांय जावण रै अेक ओछै पैँडै रै गेलै रै कारण लोगां रौ आवणौ-जावणौ इण सूगलै बास मांय सू बेसी हुवै। मोटर-गाडी कै स्कूटर-मोटरसाइकल वाळा कॉलोनी रै नैमती गेलै सू आवै-जावै। जका उपाळा जावै-जावै, वै ई नाक भींचनै, कादै सू बच बचायनै नीसरै। पण बगत कमती लागै अर पग-तुड़ाई कमती हुवै। अठै टाबर गळी मांय उछळता-कूदता रैवै अर वारी मावडल्यां ई गळी मांय, दरूजै सांम्ही कै देवळी मांय कीं खोरसौ करती निजर आय जावै। इण गत हर भांत रै मिनखां सू इण बास री रौनक, मोटी कॉलोनी सू कीं बेसी रैवै। मोटी कॉलोनी मांय लुगाई-टाबर घरां सू बारै कमती निजर आवै...।

पईसां रौ गेलौ नीं नीसर्चौ इण कारण दोनू टाबर कीं बेसी अजका-अचपळा हुयग्या। दरूजै सांम्ही बैठ्या, कादै मांय दग्गड बगावता थका कंपीटिशन करै हा, कै सै सू बेसी अर आंतरे तांणी कादै-कीच रा छांटा कुण उछळै? जद-कदै कुणई लुगाई-मोट्यार आवतौ दीसै तद दग्गड छोडनै हाथ बांध स्याणा हुय जावै। आज गंडक ई वारी गत जाणता थका आंतरे ई पड्या हा। वै ई जाणै कै जे सांकडै पूर्या तौ पटपडी मांय दग्गड खावणा पडैला। इण बगतै गेलै रै कारण आवणिया-जावणियां री लगोलगी आज ई हरमेस दाई ही।

लगैटगै इग्यारै बजग्या। तावडी बधै लागी। पण संकडी गळी रै कारण अठै अजै तांणी छियां ही। कीं ताळ पछै दो मिनख आवता दीस्या। दोनुवां रै मोढां माथै गमछा हा। दोनू भाई इत्ता भोळा ई कोनी हा। वै जाणग्या कै मोटोड़ी कॉलोनी मांय कुणई सलटग्यौ है। चाणचकै ई वारी आंख्यां मांय अेक चिलक दीसी। जियां-जियां वै दो माणस सांकडै आवता जावै बियां-बियां वै दोनू टाबर कदै आपसरी में बतळावण करै, कदै वां दोनू मिनखां कानी देखै हा।

“यार राधिया बूझ दखां।”

“म्है थारै सू छोटौ हूं यार, थूं ई बूझलै चूनिया। म्हनै दकाल मारसी यार...! थूं बूझलै। अबै वै सांकडै आवै।”

“तेरी इयां फाटै तौ मेळै खातर क्यूं हंगायौ-मूतायौ हुय रेयौ है? बूझण सू वै थनै काटे हा के हरामी? हरामडी का... वै तौ गया परा, अबै लारै सू भाजनै बूझ्यां साचाणी गदीड पडैला। बोलबाला मांय चालौ, भूख सू तिंवाळा आवै।”

“अेकर थम यार...। कीं उडीक करां, स्यात ओजू कुणई गमछा वाळा आय जावै, नींतर कॉलोनी मांय जायनै ठाह लगास्यां।” छोटकियौ छोरौ बोल्यौ।

वै कीं ताळ बैठ्या उडीकता रैया। पण वानै घणी ताळ उडीक कोनी करणी पडी। पांच-सात मिनट मांय तीन आगै अर दो माणस लारै आवता दीस्या। दो जणा तौ सिर माथै

गमछौ बांध्यां तावड़ी रौ जाबतौ कर राख्यौ अर बीजा तीन, मोढां माथे गमछा मेल राख्या हा। दोनूं छोरा ऊभा हुयग्या, वां ओपरा माणसां रै नैडै आवण री उडीक करता थका।

“भाईजी, कुण चालतौ रैयौ... ?”

“क्यूं थां टाबरां नै के मतळब ? परै जावौ।” वै तीनूं जणा आपरी बतळावण मांय घलतै विघन सूं रीसाणा हुयग्या अर आगीने बधग्या। पण छिणेक ताळ पछै गमछा लियां तीन बीजा माणस वारै नैडऱ पूग्या...।

“भाईजी, माईत कितीक औस्था लेयली ही ?”

“औस्था तौ लाडी अस्सी पार कर लीन्ही। डैण भर्यौ-पूरौ कडूंबौ लारै छोडग्यौ है।”

वै आं बेडोळा अर अणजाण छोरां कानीं घणौ गिनार नीं कस्यौ, पण चालता थका पडूत्तर तौ दीन्ही। इत्तौ पडूत्तर छोरां नै घणौ हौ। जिकी जाणकारी वानै चाईजै ही वा मिलगी ही। वां माणसां रै आगीनै टुरतां ई दोनूं नाचा-कूदी करता थका आपसरी गळबांधी करै हा।

“राधिया, अबै बेगा ई वारै लारै हुय जावां। बगतसर घर रौ ठाह लाग जावै, नींतर हांडता फिरस्यां। अजै तांणी आपरलै बासवाळा नै ई स्यात ठाह कोनी लाग्यौ।”

“हां यार ! सगळी टींगर मेड़ी कनै बावळा हुयोड़ा फिरै। आपणै दे पट्टी, भाजलै !”

वै दोनूं उभाणै पगां पाणीवारै जावणियां रै खोजांखोज लारै हुयग्या। भादवौ अबकै कमती बरस्यौ हौ। जेठ महीनै जैड़ी करड़ी लाय बरसै ही। स्यात सुरजी फगत वां माथे छतरी तांण दीन्ही ही, तद ई वानै तावडौ नीं बाळै हौ। आस रै पंखां सूं वै दोनूं टाबर उड्या जावै हा। वारी भूख अर तिरसा नीं जाणै कटै गयी परी।

दसेक मिनट ई हुया हा। आंतरै सूं अेक सांतरी कोठी आगै भेळप दीसी। अबै वारा पग हवळै-हवळै आगै बधै हा। कोठी सूं पचासेक पांवडा आंतरै वै दोनूं अेक नीमडै तळै बैठग्या। वटै सूं साव-सुभट दीसै हौ के चलावै री छेकडली घड़ी आय पूगी है। बँडबाजौ देखनै वारै उणियारै मुळक उडार खावै ही। बैकुंठी सजायोड़ी देखनै वै अबै पुख्ता कर लीन्ही के मेळै रै खरचै रौ सरंजाम हुयग्यौ। अरथी कोठी मांय गयोड़ी ही। सगळी भीड़ रै तावळ ही, क्यूंके सुरजी सिर ऊपरां बळै हौ। तावळ तौ आं दोनूं छोरां रै ई ही, पण कारण दूजौ हौ। डैण री छेकडली जातरा में अबै घणी जेज नीं ही, वै ऊभा हुया अर भीड़ रै नैडै पूग्या।

“अरे चूनिया ! वौ देख... भाण को...। इणनै टाळ बीजा तौ कटैई लुक्योड़ा कोनी है ?” चाणचकै ई छोटकियौ छोरौ अेक टींगर नै देखनै हवळै-सीक बोल्यौ। वौ छोरौ ई तके हौ के कद अरथी बारै नीसरै !

“थूं चिंत्या मतना कर, इणनै तौ सलट लेस्यां। वौ घणी हुंस्यारी दिखाई तौ सपीड़ घाल देवूला।” बडौ भाई नैहचौ दिरावतौ बोल्यौ, वीं बगत छोटकियै रै डील में आपूआप टाडाई वापरगी।

“हर कहोजी हर कहो... राम नाम सत्त है... सत्त बोल्यां मुगत...” रा हेलां रै साथै-साथै काधिया कोठी रै दरूजै सूं बारै नीसर्या। भीड़ चाल पड़ी, काधियां रै लारै। कडूंबे रा सुपातर अर मेळजोळ वाळा पुसब उछाळै हा। अेक जणै रै हाथ में रेजगी री थैली ही। अबकै

वौ मुट्टी भरनै रेजगी उछाळी। रेजगी चुगण खातर दोनूं छोरा ताचकनै भीड़ मांय जा पड़्या। रेजगी चुगण खातर भीड़ छोरां नै जिग्यां देय दीन्ही। दो-तीन बरियां रेजगी उछाळीजी। दोनूं भाई हिड़कायोड़ा-सा भीड़ रै मांय पड़ै हा। चिलकता पर्ईसां नै चुगै हा अर गोजिया मांय टूंसाँ हा। तीजै छोरै रै पर्ईसा कमती पांती आया। जियां ई वौ नेड़ै आवतौ, दोनूं जणा आडा हुय जावता कै टेलनै परै कर देवता। इयां लखावै हौ जाणै तीन गंडक हाडकां खातर राड़ करै हा। अेक बास रा गंडक अेकै कांनी हुय जावै तद बारलै बास रै गंडक रै भोरा ई पांती आया करै। पुसब अर रेजगी उछाळणौ बेगौ ई ढबग्यौ। भीड़ अणथम्यां, आपरी गति सूं आगीनै बधै ही। पण छोरा ढबग्या। वै भीड़ सूं लारै ई रैयग्या। वै जाणै हा कै वारौ काम हुयग्यौ! ओपरै बास रौ तीजौ छोरौ ई ठाह नीं कद भाग छूट्यौ। दोनूं भाई बटैई अेक नीमडै तळै थमनै गिणती करण खातर गोजियां सूं रेजगी बारै काढी। रिपियै अर दो रिपिया नै अळगा-अळगा करनै गिणती सोरी हुवै। लारली बरियां री गिणती वानै चेतै है। दोनुवां रा रळ्यनै सित्यासी रिपिया हुया हा।

“अरे राधिया, आं मांय दो रौ सिक्कौ तौ अेक ई कोनी है। धोकौ हुयग्यौ आपणै साथै। अरे... अेक रा ई नवोड़ा सिक्का पांच-सात ई है। अेक अर आठानी रौ ठाह ई नीं लागै। बरोबर ई दीसै। अै देख, घणकरी आठान्यां ई है रे...। तोल रै भाव रेजगी ल्याया है अमीरजादा! हरामजादा धोकौ कस्यौ रे, आपणै साथै।

“आं आठान्यां रौ के करां, भाईड़ा! अै तौ बजार मांय चालै ई कोनी!”

बडै भाई कनै कैवण खातर कीं नीं हौ। पसेव सूं तर अर भूखौ-तिरस्यौ वौ अबै साचाणी बावळौ-सो लखावै हौ। वौ पसवाडै पड़्या दग्गड़ दोनूं हाथां मांय चक्या अर बोलावणी करती भीड़ रै लारै भाज्यौ जकी अबै घणी आंतरे हुयगी ही। वौ आपरी सगळी तागत लगायनै भाठा बगावतौ रैयौ अर गाळ्यां ठोकतौ रैयौ, “...अरे अमीरजादै री औलादां... थानै बेगीज मौत आवैगी... कमीणां...! म्हे तौ मर्योड़ा हां पण थे ई बेगा मरस्यौ...!”

छोटकियौ भाई अबै समझग्यौ हौ, वौ ई आपरी तागत सूं भाई साथै भाज्यौ। आसै-पासै घूर्यां मांय सुस्तावता गंडक अजका हुवता परै हुयग्या।

छेकड़ली-जातरा री बोलावणी रा सुर अबै मांदा सुणीजै हा। अरथी रै लारै चालतै मिनखां नै पूठपाछै हुवण वाळै अेकलपखी घमसांण रौ ठाह ई नीं लाग्यौ।



सावित्री सदन, सी-122, अग्रसेन नगर

चूरु (राजस्थान) 331001

मो. 9414350848

● अकल काव्यपाठ

वाजिद हसन काजी

वाजिद हसन रौ जलम 24 सितंबर 1971 नै हुयौ। लारला कीं समै सू आप राजस्थानी में लगोलग लिख रैया है। केई पत्रिकावां में आंरी कवितावां छप चुकी है। अम.अ., बी.अड., अदब माहिर ताई भण्योड़ा वाजिद हसन प्रारंभिक शिक्षा विभाग में उर्दू अध्यापक है। आप नुंवी सोच-समझ सू बदळतै बगत नै आपरी कवितावां में दरसावण री आफळ करै।

ठिकाणौ : फातिमा कार्नर, मोहल्ला लायकान, किला री घाटी, जोधपुर-342002

लावौ अर सबद

खदबदै लावौ
धरती रा गरभ मांय
जोवै कमजोर पड़तां
बारै उमड़'र
सै कीं खतम करण सारू
आफळै
आभै ताई पूगण सारू
मिळ ई जावै
कोई कमजोर पड़त
बणावै केटर
पण बारै आवतां ई
बैवण लागै
पिघळ'र नीचै कानी
ईयां ई

खदबदीजै सबद
म्हारै ई मगज में
उंतावळ करै
बारै आय'र
कागद माथै मंडण री
सै कीं बदळ देवण सारू
केटर बण जावै
म्हारी कलम
बैवण लागै सबद
पण कीं नीं बदळै
धीरै-धीरै
ठंडा हुय'र जम जावै
सबद ।

मजलां मारै हेलौ

पाणी
बैवै ऊपरां सू नीचै
चुपचाप

बणावै आपरौ मारग खुद
आवौ भलाई कितरा ई अटकाव

पण
करै लगौलग आपरौ काम
अर पूग जावै
आपरी मजल ताई
कै सूख 'र मेट देवै
आपरो अनांग

देवै सीख मिनख नै
चुपचाप लगौलग
आपरो काम
करियां ई
मिलै मजलां
अर मितती जावै
अबखायां
आपौ आप

तौ पकड़ गेलौ
मजलां मारै हेलौ ।

मन री बात

दिनूंगै
जद निकळूं
घर रै बारै
तौ घेर लेवै म्हनै
मारग रा सरणाटा,

देख म्हनै
सगळा बदळ लेवै
रस्ता ।
क्यूं
आखिर म्हैं
काई करियौ किणी री ?

अच्छा...
अबे नीं बांटूं
भेळौ करियोड़ौ
अनुभव
नीं करूं किणी सूं
मन री बात ।

मिरग तिसणा

समंदर
थारौ कितरौ ऊंडौ पेट
पण काई काम री
थारै हिवडै मांय भरियौ
कितरौ खार
जे थूं नीं बुझा सकै
किणी री तिसणा

थारै सूं तौ
अै धोरा ई चोखा
जिका देवै तौ है
किणी नै
तिसणा बुझावण री अनांग
झूटौ ई सही
कीं जेज तौ
देवै थ्यावस बटारु नै
अर देवै
आगै ई आगै
बधण री हूस ।

नैणां रा बोल

पैली प्रीत
नीं भूलीजै
अेक-अेक पल-छिन
अेक-अेक दिन
बील्यौ
अेक-अेक बरस ज्युं।

बात पुराणी होयगी
पण अजै
साव नुंवी है
म्हारी प्रीत
जाणै आज री
इण सायत री
भलाई नीं दरसायी
थारै सांम्ही इणनै
पण है म्हनै
पूरौ पतियारौ
कै थे जद ई जाणता
म्हारै मन री बात
अर आज ई जाणौ।
थां भलाई मत कैवौ
पण थारा
मिरग री गळाईं मुळकता
डाबर नैण
सै कीं कैय देवै
म्हनै,
अर म्हें सहज सुणलूं
थारै नैणां रा
अणबोल्यो बोल।

प्रभातियौ तारौ

लाखां तारां बिचाळै
प्रभातियौ तारौ
चमकै,
लडै-भिडै अंधारा रै खिलाफ
चुपचाप।

देवै बटाउवां नै
मारग रा अैनानं
बंधावै धीज
छोटा बुझ्योड़ा
अर निबळा तारां नै
पण
सूरज रौ उजास
अर तेज
मेट देवै उणरी
सगळी खेचळ
तौ ई डिगै नीं
अडिया रैवै
आपरी जग्यां,

जाणै है कै
सूरज तौ डूब जावैला
पाछौ आवैला
अंधारौ तकैला
छोटोड़ा निबळा
अर बुझता तारा
बटाऊ
उणरै कानी।

फेरूं उम्मीद सूं
बंधावैला वौ
सगळ्यां नै धीज।
ॐ ॐ

● बात-बतल

राजस्थानी भासा मान्यता समिति, राजस्थान रा अध्यक्ष अर दिल्ली धरणै
रा संयोजक श्री के. सी. मालू सूँ गौतम अरोड़ा री बतल

मान्यता आंदोलण नै तेज करणौ पड़ैला : मालू

- मालूजी, राजस्थानी भासा आंदोलण रै विगत आप राजस्थानी मान्यता समिति रा अध्यक्ष होवण रै नातै राजस्थानी रै दावै नै किण रूप देखो ?
— देखो सा, राजस्थानी नै मान्यता उण बगत ई मिल जावणी चाईजती ही जिण बगत लारली बार सरकार बाकी भासावां नै आठवीं अनुसूची मांय जोड़ी। राजस्थानी भासा, साहित्य री दीठ सूँ सिमरध भासा है। प्राचीन भासा है। इणनै बोलणियां री संख्यां 10 करोड़ रै लगैटगै है। राजस्थानी भासा मांय बहुविध साहित्य है। इण देस मांय स्वतंत्रता आंदोलण मांय भी लोगां नै प्रेरणा देवण मांय राजस्थानी साहित्य री जबरी भूमिका रैयी है।
- जद अस्सी बरसां सूँ आंदोलण चाल रैयी है तो हाल ताई मान्यता नीं मिलण री वजै काई ?
— देरी रौ कारण आपां खुद हां। आपां खुद बगतसर चेत्या नीं अर जद चेत्या तौ कोई संगठित आंदोलण ऊभौ नीं व्हियौ। राजनीतिक इच्छा-सगती रौ अभाव रैयी। सरकार अर सांसदां नै विस्वास में लेवण रौ काम भी नीं व्है सक्यौ।
- लारलै दिनां आप लोग दिल्ली मांय धरणौ दियौ, इण धरणै पछै आपनै काई लखावै अर सरकार रौ रुख अबै काई है ?
— आपणौ दिल्ली धरणौ घणौ महताऊ अर सफळ रैयी। सरकार नै आ बात तौ साफ ठाह लागगी है कै राजस्थानी भासा आंदोलण अेक जन-आंदोलण है। सरकार माथै दबाव बण्यौ है, पण आपां नै लगातार सरकार नै चेतावतौ रैवणौ पड़ैला। गृहमंत्री, गृह राज्यमंत्री अर प्रधानमंत्री जी तक आपां री बात पूगी है। वारौ रुख पॉजिटिव है, पण जद ताई मान्यता नीं मिळै, खाली भरोसै नीं बैठणौ है, बल्कै जागरुक रैवणौ है।
- कोई खास सरकारी दिक्कत या पख ?
— सरकार आ बात साफ करी है कै राजस्थानी अर भोजपुरी नै आ सरकार मान्यता बेगी ई देवैला अर जिकी सरकारी प्रक्रियागत देरी है, वा जरूर है। पण आ बात है कै वै आपां नै कैय देवै कै मान्यता बेगी ई देवांला अर आपां ढीला पड़ जावां तौ पार पड़णौ दोरौ है, जद ताई काम नीं व्है, लारै लाग्यौ रैवणौ है।

● जे राजस्थानी नै मान्यता मिल जावै तौ आपनै काई लागै, राजस्थानी सरकारी कामकाज री भासा व्हे जावैला ?

— देखो सा, आ बात इत्ती सोरी कोनी। राजस्थानी भासा नै व्यवहार मांय लावणी पड़ैला। पढाई-लिखाई मांय राजस्थानी नै जोड़ण सारू सैकंडरी, हायर सैकंडरी स्कूलां अर कॉलेजां मांय राजस्थानी विसय खोलावणौ पड़ैला। दूजी राजभासा बणावण मांय केई अबखायां है, पण काम में लाग्योड़ा रैवां तौ असंभव कोनी।

● आपरै मुजब मान्यता कद ताई मिल सकै अर जे नीं मिली तौ मान्यता समिति रै आंदोलण री आगामी रणनीति काई व्हेला ?

— यूं तौ इण बाबत कोई अंदाजौ करणौ मुस्किल है, पण आज रै वातावरण नै देखता थकां औ लागै कै बजट सत्र रै पैलां-पैलां राजस्थानी नै मान्यता मिल सकै। पण जे नीं मिळै तौ औ आंदोलण बडै स्तर पर जन आंदोलण रै रूप में आगै बधैला। म्हे लोग गांव-गांव सदस्यता अभियान चला रै पचास लाख लोगां ताई म्हांरी बात पूगावणै री तयारी करी है। सोसल मीडिया रौ उपयोग भी कर रैया हां अर जरूरत पड़ी तौ आंदोलण और तेज करांला। युवा सगती अर छात्र मोरचौ 'राजस्थान बंद' री तयारी में है। क्रमिक अनशन अर राजघाट माथे मरणौ-धरणौ भी आंदोलण री कड़ी मांय है। पण औ सब समिति री केंद्रीय कार्यकारिणी आपरी आगली बैठक मांय तै कर संगठित रूप में सांम्ही लावैला। जै राजस्थान। जै राजस्थानी।

● बात-बतल-2

राजस्थानी भासा मान्यता संघर्ष समिति रा पूर्व अध्यक्ष अर 2003 रै जयपुर धरणौ रा संयोजक भरत ओळ्ळा सूं गौरीशंकर कुलचंद्र री बतल

राजस्थानी नै मान्यता इणरौ वाजिब हक : ओळ्ळा

● भरत जी, आप राजस्थानी भासा री मान्यता रै दावै नै किण रूप में देखौ ?

— राजस्थानी भासा रौ हजार बरसां सूं बेसी रौ आपरौ इतिहास है। तीन लाख सूं बत्ता ग्रंथ, साढी तीन लाख सबदां सूं बेसी रौ सबदकोस है, खुद रौ व्याकरण है। भासा वैज्ञानिक इणनै अेक सिमरध भासा मानै। स्कूलां, कॉलेजां मांय राजस्थानी विसय पढाईजै। राजस्थानी भासा नै दस करोड़ सूं बेसी लोग बोलै। राजस्थानी भासा, भारतीय भासावां मांय बोलणियां री संख्या री दीठ सूं सांतवै अर विश्व रै मांय सोळ्ळीं ठौड़ माथै है। इण भांत इण भासा सूं आप सवाल ई कीकर खड़ौ कर सकौ कै आप मान्यता रा हकदार हौ कै नीं हौ। औ सवाल नीं है, म्हारौ हक है जिकौ आपोआप ईज मिल जावणौ चाईजतौ, पण पीड़ है कै म्हांनै लड़णौ पड़ रैयौ है। औ राजस्थानियां रौ वाजिब हक है। सरकार नै सोचणौ चाईजै कै इण सारू कोई महाभारत नीं मंडै अर म्हांनै म्हारौ हक मिळ जावै।

- जयपुर धरणा रा आपरा काई अनुभव रैया।
— जयपुर धरणा री बगत सगळै जिलां मांय मान्यता समिति री इकाइयां ही। विधानसभा माथै पैलौ धरणौ हौ। लोगां मांय अेक उमाव हौ। लोगबाग सगळ्यां जिलां सूं बसां भरीज-भरीज जयपुर में पूग्या। धरणा रै पछै तत्कालीन मुख्यमंत्री अशोक गहलोत वारता बुलाय 'र पूछ्यौ कै आप राजस्थान सरकार सूं इण बाबत काई चावौ ? संघर्ष समिति उण बगत अेक ईज मांग करी कै विधानसभा मांय अेक संकल्प प्रस्ताव पास करवा 'र केंद्र सरकार नै भिजवावौ। पछै मुख्यमंत्री जी वादौ कर्यौ अर वै इण वादै माथै खरा पण उतरिया अर राजस्थान विधानसभा सूं 23 अगस्त, 2003 नै औ संकल्प प्रस्ताव सर्वसम्मति सूं पारित करीजनै केंद्र सरकार नै भिजवाईज्यौ।
- राजस्थानी भासा री मान्यता मांय देरी रा काई कारण है।
— आज बजारू जुग है। सरकार सारू इण बजारू जुग मांय कला, संस्कृति, भासा सब सैकंडरी विसय है। सरकार आनै ज्यादा महताऊ नीं मानै अर ना ई आंरी गिनार करै। बजारू जुग मांय सैं कीं नफा-नुकसाण अर अरथ सूं जुड़्योड़ौ व्हे। हर कोई 'इण हाथ दौ, उण हाथ लौ' रै हिसाब सूं चालै। बजार हर चीज नै अरथ अर उत्पाद सूं जोड़ नै देखै। भासा अर साहित्य रौ परिणाम तुरत-फुरत नीं निकळै। इण मांय धीजाई चाईजै। इण सारू राजनेता इणनै लेय 'र संवेदनहीण है। सरकार कोई रिस्क भी नीं लेवणी चावै। सगळ्यां नै राजी राखणा चावै। सर्वश्री गुमानमल लोढा, लक्ष्मीमलजी सिंघवी, ओंकारसिंह लखावत, सांसद अर्जुन मेघवाल जिसा लोग आपरी बात संसद मांय राखी है। अर्जुन जी री मैणत घणी सरावणजोग है।
- आंदोलण री विगत री कोई खास बात।
— पैली आंदोलण जमीनी हौ। पछै फेसबुक ताई सिमटण लाग्यौ। पण सोसल मीडिया रै जनजागरण रै मारफत लोग आंदोलण सूं जुड़िया। लारला दस साल मांय नेतृत्व री कमी रै चालतां आंदोलण कमजोर व्हियौ, पण 'दिल्ली धरणा' नै देखनै लागै कै अबै नेतृत्व सई हाथां मांय है। युवा सगती अर छात्र मोरचौ कमान संभाळी है। अबै जे सरकार इणनै टाळै तौ आंदोलण और उग्र व्हेला।
- आगै री कोई रणनीति ?
— आंदोलण नै गांव-गांव ताई पूगा रैया हां। तैसील स्तर माथै समितियां रौ गठण चल रैयौ है। युवावां नै भासा अर रुजगार रौ जुड़ाव समझ में आवण सूं युवा घणा जुड़्या है। वांनै आंदोलण रौ नेतृत्व भी सूपण री त्यारी है। सगळा राजस्थान मांय दो हजार सूं बेसी ग्राम पंचायतां है, बटै काम जारी है। सब ठौड़ समितियां बणावण रा प्रयास है। धरणा-प्रदरसन तेज व्हेला। साहित्यकार ई नीं, सगळा भासाप्रेमी अर छात्र इण बात मानै के आ फगत भासा री नीं, पेट री अर हक री लड़ाई है। आगै 'राजस्थान बंद' भी करियौ जाय सकै। म्हानै विस्वास है कै सरकार खुद इण बात नै मानै कै भासा री मान्यता री लड़ाई जन-आंदोलण है अर राजस्थानी भासा री संवैधानिक मान्यता रौ मामलौ अबै ज्यादा दिन ताई टाळ्यौ नीं जाय सकै।

ॐ ॐ

● अनुसिरजण

लीलाधर मंडलोई

हिंदी रा ख्यातनाम कवि-आलोचक अर संपादक लीलाधर मंडलोई रौ जलम जलमाष्टमी 1953 नै गुढी (छिंदवाड़ा) मध्यप्रदेश में हुयौ। *चावी पोथ्यां*: अेक बहुत कोमल तान, रात-बिरात, मगर अेक आवाज, देखा-अदेखा, क्षमायाचना, लिखे में दुक्ख, काल बांका तिरछा, मनवा बेपरवाह, दिल का किस्सा, अर्थ जल, दाना-पानी, कविता का तिर्यक, कविता के सौ बरस आद। केई मान-सम्मान अर पुरस्कार जिण मांय खास है— पुश्किन, शमशेर, नागार्जुन, रजा, रामविलास शर्मा (सगळ कविता खातर), कृति सम्मान, साहित्यकार सम्मान (दिल्ली राजधानी, साहित्य अकादमी) आद। दूरदर्शन रा महानिदेशक रैया मंडलोई अबार भारतीय ज्ञानपीठ रा निदेसक अर ज्ञानोदय मासिक पत्रिका रा संपादक है।

ठिकाणो :166 दूसरी मंजिल, कैलाश हिल्स, नवी दिल्ली-65

मोबाइल : 9818291188 ई मेल : leeladharmandloi@gmail.com

भासा-1

मैं लिखूं
उण भासा में

जिकी
ओळखै म्हनै।

भासा-2

जिकी भासा सपनां रे साथै-साथै चालै
जियां काल देख्यौ मैं सपनौ
बरसै ही लाय आभै सूं

आज म्हारी भासा औ बिरवौ लगावै।

भासा-3

ऊदई रौ घर
कमाल रौ रूपाळ्यौ
पण कितौ अबखौ

रचू खुद री कविता
दीमक री भासा मांय।

फूल

कदैई जिकौ कैयौ हुवैला-
हाडका नै फूल

उण ईज देख्यौ हुवैला—
मिनख मांयलौ फूल।

सूरज री सीध में

कान है पण कान कोनी देवै
हाथ है पण हाथ कोनी देवै
आंख है पण आंख कोनी देवै
मन है पण मन कोनी देवै

काम माथै जावती छोरी
जावै काम माथै
सूरज री सीध मांय ।

बिना किणी कवि रै

घणौ अबखौ हुवै कविता मांय
जीसा नै
जियां रा जियां ई लिखणौ

लिखूं जद
अक सबद— जीसा
म्हारा चाळीस बरस
पड़ जावै ओछा

जीसा री छिया
जीसा रौ हेत
जीसा री मौत
कोनी उतर सकै
कविता मांय सागण ढाळे

जीसा कवि रै मांय है
जियां रा जियां
पूरण हा जिण ढाळे बै

म्हारौ अंतस भरियौ-पूरौ
जीसा सूं

जीसा खुद अक मुकम्मल कविता हुवै
बिना किणी कवि रै मांड्यां ।

मंतर

घणी कामेड़ी हुवै मौमाख्यां
फूलां सूं पराग
अर मकरंद करै भेळौ
खुद री टांगां बिच्चै बणी
उण टोकरी मांय
जिकी दीसै कोनी

मौमाख्यां त्यार
करै है सैत
अर करै रुखाळी
बारलै हमलै सूं उण री

अलेखू दुसमियां बिचाळे घिर्योड़ा हां आपां
अर रुखाळी ई कोनी कर सकां

आपां मौमाख्यां सूं सीख्यौ कोनी औ मंतर ।

कपाळ-किरिया

मा री चिता
बस चटकती लकड़ियां री गूंज ही
बगत हुयग्यौ हौ
पंडित जी केयौ
'कपाळ-किरिया'
अर झला दियौ अक बेडोळौ लंबौ मोटौ बांसडौ

ठाह नीं कांई हुयौ
म्हें झाल लियौ
भाई रौ हाथ
अर बोल्यौ चाणचक
'जरा 'क हळकै हाथ सूं'
अर मींचली आंख्यां ।

जातरा

अेक लोटौ
अेक डोरी
अेक अंगोछौ
अेक कांबळ
अेक पोटळी
अर अेक डांग
अब कोई पण जातर दौरी कोनी ।

लडूं तौ हूं पण

लडूं तौ हूं पण
पूरी तरै लडण री गत मांय कोनी

जीवूं तौ हूं पण
पूरी तरै जीवण री गत मांय कोनी

मरूं तो हूं पण
पूरी तरै मरण री गत मांय कोनी

मा जीवै अर अबै चालीजै कोनी
अर परिवार...

माफी चावूं म्हारै पाखती दूजौ मारग कोनी
थोड़ा 'क भळै उडीकौ ।

लाय

भिडै— सबद सू सबद
म्हारी मेज माथै

अेक चिणखी-सी उटै
अर कविता लाय दाई
पसर जावै

लाय नीं तौ कविता क्यांरी... ।

मैं देवूला हिसाब

मैं देवूला हिसाब
खुदरी मूरखता, हेकड़ी, घमंड अर लोभ रौ

म्हारै ऊंडै बसियौ हौ कोई सक
जिण माथै मैं करतौ रैयौ अणूतौ पतियारौ

मैं मरणौ कोनी चावतौ हौ उण रै हाथां
जद कै जीवणौ थारै भेळै कितरौ अबखौ

आ अेक सीधी-सरल बात है कै
थे कोनी चावौ म्हनै

म्हारै खातर का डूब मरण री बात
जद कै थे म्हारा इत्ता खास

मैं अबोलौ हूं अेक रूख दाई
इण रो मतलब ओ कोनी कै
मैं कोनी हुय सकूं थारै दाई

हुवणौ थारै दाई डूब मरै जैड़ी बात हुवैला ।

जीवण बाबत

सगळी तजबीज कर्यां ई
धरती सू पचै कोनी
नामुदार प्लास्टिक

अर अबै परमाणु कचरै रै स्वागत मांय
कितौ कसमसीजै औ राज

कूपळां अर फूलां रौ तौ कैवणौ ई काई
छोटिया टाबरां रै जीवण बाबत
सोचणौ कद बंद हुयौ ।

पाव ब्रेड री बात

जद कै बा रौ रैयी है
म्हें कोनी करूला पाव ब्रेड री बात
मा दोय दिन जूनी रोटियां रै
बासी सूक्योडै टुकड़ा नै
गिला करैला गुड़ रै पाणी मांय
अर उडीकैला कै बावड़ जावै
बासी सूका टुकड़ा सूं
जरा 'क पीलपीलौ लखाव पाव ब्रेड रौ
निजरा लुकोवतौ भाळतौ रैसूं मा भेळै
लुगाई री बापड़ी आंख्यां में
म्हें दर ई कोनी करूला
पाव ब्रेड री बात
म्हारी जेब सूं साव परबारी है
औ है महीनै रौ छेहलौ दिन ।

कार्बन मोनोऑक्साइड

कटै सूं आवै इत्ती
कार्बन मोनोऑक्साइड
कै बरफ पिघळै
बगत सूं पैली

धंसकै डूंगर होळै-होळै

होळै-होळै खूटै जीवण ।

गद्य कवितावां

कै लूण रोटियां मांय

दिनूगै-सिंझ्या... समदर सूं उटै धोळौ धप्प
धूंवौ... पण समदर सूं कोनी आवै खांसता-
खांसता बेदम हुवणवाळा री अवाजां...
अबकी दाण मा सूं कैवूला कै चाल परी
म्हारे साथै अर पो परी देख रोटियां कै जटै

धूंवौ हुया करै अणथाग, पण कोनी हुवै ऊंडै
ताई हिला देवण वाळी खांसी... मा जद पोसी
रोटियां बां मांय समदर रौ सुवाद हुवैला अर
कितौ किफायती अर स्वादू हुसी रोटियां रौ
पोणौ । कै लूण रोटियां मांय मत्तै ई पूगैला...
समदर माथै खासां आपां जद रोटियां... पूगैला
सुवाद ई आपी-आप मांय रो मांय अर आपां
सुवाद रा समदर हुय जासां अेक दिन... अेक
दिन... ।

हत्यारा उतरग्या क्षीरसागर मांय

(अेक)

म्हें हमेस नेहछै री नींद लेवतौ । अर अबै जागूं
जागै नींद मांय । डरावणा सपनां मांय डूब्योडी
है रातां । म्हें हत्यारां नै देखूं सपनां मांय । बां रा
चैरा अडोळा दीसे कोनी । बस बां रौ हुवणौ
मैसूस करूं जाणकारां जिसौ । बै चैरा-मौरां सूं
तौ चोखै घरां रा खावता-पीवता दीखै । बां
पाखती जोरदार मोटर-कारां है । बै अमूमन
मोटी-मोटी कोठ्यां सूं निकळ'र आवै । बां रै
लारै चालणियां री जमात है । जिका नवी-नवी
सकलां मांय हरेक ठौड़ हाजिर हुवै । बै हथियारां
सूं सज्या-धज्या । बां री आत्मा रौ पाणी सूकग्यौ ।
कारण कै बै रिपियां रै जोर सूं उण हरेक जिनस
नै खरीदण नै आमामादा है जिण मांय पाणी हुवै ।
अर राज खुद आपरै ढंग-ढाळै लागै इण बौपार
मांय हत्यारां रौ साखी बणग्यौ । म्हारै इण सुपनै
में जिकौ बिना किणी स्टिंग ऑपरेशन रै सूझ
रैयौ है, म्हनै कंठां ताई डर मांय डूबौ देवै । म्हें
चीसाळी मारणी चावूं पण आवाज जाणै कंठां
मांय अडगी । सपनौ म्हनै लियां भाजै च्यारूमैर ।
अर म्हें देखूं बौ जिकौ कदैई देख्यौ कोनी ।
अर इण ढाळै तौ दर ई कोनी देख्यौ । म्हनै
लखावै म्हारी आत्मा लोहीझ्याण ।

(दोय)

म्हें तौ बंधक हौ बां रौ। बियां तौ ओ सपनौ हौ। म्हें बां रौ लारौ करियौ। कै जाण सकूं बौ साच जिकौ आखै जीवण सूं घणौ भारी। पाणी कमती हुवतौ अडाणै कटैई। उण खातर म्हें न्हासूं कै बौ कित्तौ बचै का फेर बच जावैला पूरौ। पीढियां री हेमाणी लियां। म्हें पूगूं अेक मा री कूख मांय। बटै अेक भ्रूण है। खुद रै भार रै तिरेसठ फीसदी पाणी मांय। उणी 'ज सूं प्राण उण रा। म्हें कियां ओळखूं कै बौ उणी मात्रा मांय है। अर बच जावैला जापतैसर। जे पाणी कमती हुयौ। तौ बौ कित्तौ बच्योड़ौ हुवैला जद कै जूण पासि। म्हें पूगूं अबै खुद री देही मांय। बटै उण नै हुवणौ चाइजौ दोय-तिहाई का तीन-

चौथाई। अर लोही रै प्लाजमा मांय च्यार फीसदी हुवणौ जरूरी है। अर कोशिकावां मांय सोळै फीसदी। काई इतौ पाणी सही-सही मात्रा मांय हुवैला। अठीनै म्हें केई बीमारियां सूं घिरग्यौ हूं, अबै सपनै मांय म्हें हूं डागदर री टेबल पाखती। बौ जांच करै अर परची मांय सावचेतियां लिखै। मोटै आखरा मांय बौ मांडै 'शुद्ध पानी' अर सेवन माथै जोर देवै, आ जाणता थकां कै अबै फगत बच्यौ प्रदूसित पाणी। बजार रै दावां नै गळै लटकायां म्हें भाजू शुद्ध पाणी खातर। अर कूड़ माथै अंतबार करूं कै जिकौ साच दाई पुरसीजै। कै अबै इण मांय अकूत वौपार। बस शुद्ध रौ विग्यापन है अशुद्ध। पाणी मांय बौ हुसी, औ पतियारौ कोनी हुवै अर डर सूं कांपण लागूं।



उल्थाकार परिचै

राजस्थानी रा कवि-आलोचक अर संपादक डॉ. नीरज दइया रौ जलम 22 सितम्बर 1968 नै रतनगढ़ (चूरू) में हुयौ। 'निर्मल वर्मा के कथा साहित्य में आधुनिकता बोध' विषय माथै पी.एच.डी.। प्रकासित अनुवाद : पंजाबी काव्य-संग्रै / अमृता प्रीतम 'कागद अर कैनवास' (2000), हिंदी कहाणी-संग्रै / निर्मल वर्मा 'कागला अर काळौ पाणी' (2002), चौबीस भारतीय भासावां रै कवियां री कवितावां रौ राजस्थानी अनुवाद 'सबद नाद' (2012), गुजराती जातरा-वृत्तांत / भोलाभाई पटेल 'देवां री घाटी' (2013) अर मोहन आलोक रै पुरस्कृत राजस्थानी कविता-संग्रै रौ हिंदी अनुवाद 'ग-गीत' (2004)। केई मौलिक अर संपादित पोथ्यां प्रकासित। आलोचना पोथी 'बिना हासलपाई' चर्चित। साहित्य अकादेमी, नवी दिल्ली सूं 'जादू रौ पेन' माथै बरस 2014 रौ 'बाल साहित्य पुरस्कार', राजस्थानी भासा, साहित्य एवं संस्कृति अकादेमी, बीकानेर सूं 'बावजी चतुरसिंहजी अनुवाद पुरस्कार' आद केई पुरस्कार, मान-सम्मान मिल्योड़।

ठिकाणौ : सी-107, वल्लभ गार्डन, पवनपुरी, बीकानेर-334003

मोबाइल : 9461375668 ई मेल- neerajdaiya@gmail.com

● काव्य-गोष्ठी

मुकुट मणिराज

घट्टी

सूरज-चांद-सा पाटां बीचै
दळ्या-पीस्या नौ लख तारा
गरणगट करता ढीली होई
'मानी' का अपराध में
झेलती री लोढ्यां की मार
मोटा पीसणा की सजा में
'पंछाती' री बार-बार पेट
पूरा जीवट सूं अजमायौ
घर-धरियाणी का पुणचां को जोर
ऊंका चूड़ां की खणक अर
मीठा-मीठा गीतां की रुणक में
मलाती री अपणी अणहद राग
जीं नै सुण'र पूरौ घर
काढतौ रैयौ मीठी-मीठी नींद
घर-धरियाणी की लेरां जागी
अर लेरां सोई ।
भूखी तिसाई रैय'र
भरती री जगती रौ पेट
चालती री चालती री अर
घसती री पण नीं जाणी
थाकबौ, नटबौ, रूसबौ
कोरी अक घाघरी पैर'र
काढली बगत, मौज में
पण 'बगत' कुणकौ होतौ आयौ छै

जीं कै बिना अेक दिन
काढणौ पड़ै छौ भारी
नीं बळै छौ घर में चूलहौ
धधक उठै छी पेटां की आग
आज बा जर्जर अेक खूण्यां में पड़ी
खा री छै धूळौ / तकदीरां की मारी
दूबती आंख्यां सूं देखरी छै, अपणी मौत
बापड़ी डोकरी— घट्टी ।

❖ ❖

'वृद्धि', विजयवीर स्टेडियम रै कनै, बालापुरा
कुन्हाड़ी, कोटा-324008

जेबा रशीद

दुस्मण दोस्त यादां

थारी यादां रा फूल
दिन री हलचल मांय
व्यस्तता री धूप में
कुमळीज जावै है
पण रातां रै सरणाटां मांय
बादळं ज्यूं
म्हारै ख्यालां मांय
छाय जावै है ।
दुस्मण जैड़ी यादां
बेचैन कर जावै है
उणां सूं डरूं हूं
पण सच्चाई आ है कै
यादां ई म्हनै
दोस्त री नांय सुलावै है
थानै सपना में बुलावै है
थारै सूं मिलावै है ।

❖ ❖

151, चौपासनी चुंगी चौकी रै लारै, जोधपुर (राज.)
मो. 9829332268

हरदान हर्ष

अेक और सदी

न बणी रा पखेरू जाणै
न गांव रै चंदर नै पतौ कै
टिक-टिक करतां आयगी
अेक और सदी ।

मझ-सावण
मरु-तिरसौ
गीगलौ धोरां बैठ्यौ
आभौ ताकै ।

निबळा घरां रात अंधारी
पेट कै गांठ
अधनागौ आजतांई
धरती पोढै आकास ओढै ।

लूण तेल लकड़ी री जुगत करतौ
गांव नीं जाणै
नुंवी सदी रा जसन में
पांच सितारा होटल रौ छकणौ ।

सत्ता रा विदेसी गळियारा 'क
पच्छिम री ढाळ ई
कामयाब व्हेली
अठै या नुंवी सदी ।
❖ ❖

अे-306, महेश नगर
जयपुर-302015
मो. 9785807115

● पोथी-परख

डॉ. नीरज दइया

म्हां जिकौ भेळै देख्यौ, देखजौ अबै अकला

पारस अरोड़ा री ओळखाण कवि-संपादक अर उल्थाकार रूप चावी-ठावी। माणक अर बीजी पत्र-पत्रिकावां रै मारफत आपरौ करियोडौ उल्थौ फुटकर अर विसेसांकां मांय देख सकां, इणी ओळ मांय साहित्य अकादेमी खातर हिंदी कवि मंगलेश डबराल रै पुरस्कृत काव्य-संग्रै 'हम जिसे देखते हैं' रौ राजस्थानी उल्थौ 'म्हां जिकौ देखां' (2013) आप करियो। अठै औ पण उल्लेखजोग है कै कवि राजेश जोशी री लांबी हिंदी कविता 'समरगाथा' रौ उल्थौ ई आपरौ सांम्ही आयौ। अठै औ पण कैवणौ पडैला कै लारला बरसां राजस्थानी मांय उल्थै पेटै साहित्य अकादेमी सांतरौ काम करियो।

जद कोई खिमतावान कवि-संपादक उल्थौ करै तद मूळ कवि री ऊरमा नै उल्थाकार सू बेसी कवि-उल्थाकार उजागर करै। राजस्थानी कविता रा कीरत-थंब पारस अरोड़ा 'राजस्थानी अेक' सू ओळख रै मारग पूग 'र' 'झळ', 'जुड़ाव' अर 'काळजै में कलम लागी आग री' जिसी काव्य-पोथ्यां अर 'अंवेर' जिसै संकलन रै संपादन सू आपरी भासा-सिल्प भेळै काव्य-मुहावरै रौ अेक रुतबौ कायम करियो। मंगलेश डबराल री आं कवितावां नै बांचती बगत इयां लागै जाणै कवि डबराल राजस्थानी-कवि रौ रूप धारण कर लियो हुवै, आ इण उल्थै री खासियत कैयी जावैला।

'हम जिसे देखते हैं' रौ उल्थौ 'आपां जिकौ देखां' री जागा उल्थाकार 'म्हां जिकौ देखै' करियो। अठै गौर करण री बात है कै उल्थै मांय जद किणी सबद नै किणी सबद खातर काम लेवां तद उण लारै ऊंडी दीठ ई हुया करै। आपां अर म्हां मांय झीणौ आंतरौ देख्यौ जाय सकै। अेक तो आप सू आपां बण्यौ है अर म्हें सू म्हां। आपां अर म्हां मांय निजता री बात करां तौ ई म्हां मांय बेसी आत्मीयता अर अपणायत रौ भाव देख सकां। असल मांय पूरै कविता-संग्रै मांय कवि आसै-पासै री चीजां नै अपणायत अर आत्मीयता रा भाव लियां देख रैयौ है अर आपरै देख्योडै दीठावां नै सबदां रै मारफत कवितावां मांय दरसावतौ जाणै आंख्यां सांम्ही न्यारा-न्यारा चितराम प्रगट करिया हुवै।

गद्य कवितावां पेटै कमती कवियां काम करियो है, इण संग्रै मांय हिंदी अर भारतीय कविता-जातरा मांय हुवता बदळव अर केई प्रयोग ई देख्या जाय सकै। कविता रै सीगै गद्य

कवितावां तौ संग्रै मांय मिलै ईज पण पद्य जिकौ गद्य सू बिना किणी खेल का चमत्कार रै होळै-
होळै कविता रै रूप मांय प्रगट हुवै वौ ई उल्लेखजोग कैयौ जावैला। 'कीं बगत सारू' कविता रौ
औ अंस देखां— कीं बगत सारू म्हें कवि हौ / फाटी-जूनी कवितावां री मरमत करतौ थकौ/
सोचतौ थकौ के कविता री जरूत किण नै है।

कविता रै रचाव मांय कवि जिकी मरमत करै वा मरमत उलथै मांय बेसी करणी पड़ै।
हरेक भासा री आपरी सबदावली अर कविता रौ मुहावरौ हुया करै, उणनै बचावतां थकां
उलथाकार बीचलौ मारग काढै। इण नै इयां पण कैय सकां कै कविता रौ उलथौ दूजै जलम दाई
हुवै जिण मांय नुवै जलम मांय लारलै जलम री आतमा वास करै।

कवि री आपरी दुनिया हुवै अर उण दुनिया नै देखण-परखण रौ ढंग। कवि डबराल री
कवितावां मांय मधरौ व्यंग्य ई घणै मरम भेळै उजागर हुवै। दाखलै सारू बात करां कविता
'बारै' बाबत। आ कविता मांय कवि रै कविता लिखण पेटै लिखीजी है अर वां चीजां अर
दीठावां रौ बखाण ई कवि करै जिकौ उण रै कविता रचाव रै बगत उणां सांम्ही हुवै, पण कवि
बिना किणी सवाल करियां सेवट वां दाखला नै पाछौ बतावतौ मांडै कै उण री कविता मांय
आंख्यां सांम्ही जिकी चीजां है, वै क्यूं नीं। इणी मरम नै कविता खुद रौ अंधारौ खोलै— जद
रोसणी हुई / पड़छांवळी दीसी / खुद सू मोटौ दीस्यौ / खुद रौ अंधारौ।

असल मांय कवि आपरै आसै-पासै रै अंधारै माथे का दिन थकां नीं दीसती चीजां नै
दरसावण खातर ई कविता मांडै। कवि दादोसा, बाबोसा, मां अर खुद री फोटू देखतां थकौ
कविता मांडै। दूजै पासी कीं विसय लेय 'र कवितावां मांडै जियां— 'कागद', 'नींद', 'सपना',
'टाबरपणौ', 'चांद', 'निरासा', 'आंसू', 'हासियौ' आद।

किणी रचना नै सबद-सबद साधता कोई ओळी साधीजै, पण सबद री ओळख कर
उण नै किणी ओळी मांय राखणौ अर उण रै जोड़ मांय लगोलग मेळ रा सबदां रौ साथौ मिलणौ
दीसै जितौ आसान कोनी हुया करै। कविता 'सात ओळियां' इणी मरम नै दरसावै— मुस्किल
सू हाथै लागी अकेक आसान ओळी / अकेक दूजी बेडोळ-सीक ओळी में समायगी / वा तीजी
तूटी-भागी किसम री ओळी नै धक्कौ दियौ / इण तरै मुस्किल-सीक डिगमिगावती चौथी
ओळी बणी / जिकी खाली झूलती थकी पांचवीं ओळी सू उळझी / वा छटपटायनै छठी ओळी
नै सोधी जिकी आधीज लिखीजी ही / सेवट सातवीं ओळी में पड़्यौ ओ सगळौ मळबौ। आ
कविता आज रै जुग मांय भासा रै बरबाद हुवण रौ दीठाव कमती सबदां सखरै रूप परोटै।

किणी रचना री सफलता इण बात मांय पण जाणीजै कै उणनै बांचती वेळ उण रै आगै
रौ दीठाव-बखाण बांचणियां रै सोच मांय आगूच नीं आय जावै। खासकर गद्य कवितावां मांय
कवि किणी ओळी नै कैवतौ-कैवतौ ठा ई नीं लागण देवै अर कठै सू कठै पूग जावै। नुवी अर
न्यारी न्यारी दीठ रा दरसाव राखती आं कवितावां मांय उलथाकार री खासियत आ कै जिण मूळ
भासा अर बुणगट नै बचाय 'र आं नै राजस्थानी मांय लावण रौ कारज इण ढाळै करीज्यौ है कै
कठैई कोई सबद का ओळी रडकै कोनी।

संग्रै मांय छेहली कविता रै रूप 'पाछी घडत' नांव सूं सोळा कवितावां इण टीप साथै मिलै— “अँ कवितावां परबत रा खासा इलाकां रा अँड़ा लोकगीतां सूं प्रेरित है जिकां नै लोक-कवितावां कैवणौ वत्तै सही व्हेला पण औ वारौ उल्थौ कोनी।” डबराल री आं ओळ्यां अर जिकी कवितावां किणी रौ उल्थौ कोनी उण रौ औ उल्थौ बांचणौ नुंवौ लखावै। अँ जिकी नै लोक कवितवां कैवण री बात लिखीजी है, साव नवी कवितावां रै जोड़ री कवितावां लखावै। आं कवितावां रौ मूळ जिका बांच्यौ है वां नै आ जाणता जेज नीं लागैला कै उल्थै मांय कवितावां री आतमा साकार हुवै, इण उल्लेखजोग काव्य-संग्रै रै सरावणजोग उल्थै सारू उल्थाकार-कवि-संपादक पारस अरोड़ा नै घणा-घणा रंग।

मंगलेश डबराल का कोई पण कवि रौ काम बांचणियां नै अँक दीठ देवणौ हुया करै। वा दीठ जिण सूं संवेदनसील कवि आपरै आसै-पासै रै जगत नै देखै-परखै अर रचाव मांय रंग भरै। इण पोथी रै पूरै पाठ पछै लखावै जाणै कवि कैय रैया हुवै— म्हां जिकौ भेळै देख्यौ, देखजौ अबै अँकला।

पोथी : म्हां जिकौ देखां (मंगलेश डबराल, उल्थौ : पारस अरोड़ा) संस्करण 2013
प्रकासक : साहित्य अकादमी, नई दिल्ली / मोल 100 रिपिया / पाना-84



सी-107, वल्लभ गार्डन
पवनपुरी बीकानेर (राज.) 334003
मो. 9461375668

दिल्ली में गूजी राजस्थानी री मान्यता री दहाड़

राजस्थानी भासा री संवैधानिक मान्यता सारू संसद भवन रै कनै जंतर-मंतर माथै 6 मई नै दिल्ली में दहाड़ सुणीजी। जंतर मंतर माथै आयोजित इण अेक दिन रै सांकेतिक धरणै में लगैटगै पांच हजार सू बेसी राजस्थानी भासा रा हिमायती हिस्सौ लियौ। मीरांबाई रै मेड़तै सू 15 मार्च नै मायड़ भासा राजस्थानी छात्र मोरचा रै प्रदेस स्तरीय जळसै में हुयै 'दिल्ली धरणै' रै निरणै मुजब मोरचै अर राजस्थानी भासा मान्यता समिति री भेळप में दिरीज्यै इण धरणै रौ जबर असर हुयौ अर प्रधानमंत्री अर गृहमंत्री राजस्थानी भासा री मान्यता सारू आंदोलन करण वाळां रै प्रतिनिधि मंडल नै खुद बुलावौ भेज्यौ अर ज्ञापन सांभळ्यौ। साथै ई औ आस्वासण पण दियौ कै मानसून सत्र में राजस्थानी-भोजपुरी अर भोटी भासा नै संविधान री आठवीं अनुसूची में लावण सारू संसद में प्रस्ताव राखीजैला। बिहार चुणाव री प्रक्रिया रै चालतां मानसून सत्र में औ प्रस्ताव नीं आय सकौ पण संसद रै सीतकालीन सत्र में औ प्रस्ताव राख्यौ जाय सकै है।

जंतर-मंतर माथै अेक दिन रै सांकेतिक धरणै रै इण जळसै री खास बात आ रैयी कै आखै राजस्थान सू राजस्थानी में अेम.अे., नेट-स्लेट अर पीअेच.डी कर्चोड़ा छात्र अेकठ हुया अर ढोल-तासां रै ढमाकै सागै वां आपरी इण धरणै में हाजरी मंडायी। इण भांत राजस्थानी भासा री मान्यता रौ सवाल अबै युवा अर रुजगार रौ सवाल बणग्यौ है।

इण सू पैलां 3 अप्रैल नै विंडसर प्लेस, नई दिल्ली में बीकानेर रा सांसद अर्जुनरामजी मेघवाळ रै रैवास माथै इण धरणै नै मूरत रूप देवण सारू पैली बैठक राखीजी। इण बैठक मांय राजस्थान संस्था संघ रा अध्यक्ष सुरेश खंडेलवाल, वरिष्ठ साहित्यकार देवकिशन राजपुरोहित, अ. भा. मारवाड़ी युवा मंच रा राष्ट्रीय अध्यक्ष रवि अग्रवाल, मायड़ भासा राजस्थानी छात्र मोरचा रा प्रदेस संयोजक गौरीशंकर कुलचंद्र, माणक रा संपादक पदम मेहता, मारवाड़ी युवा मंच रा कोषाध्यक्ष पवन कुमार गुप्ता सामल हुया। इण बैठक में 6 मई नै दिल्ली रै जंतर-मंतर माथै धरणौ देवण रौ निरणै लिरीज्यौ।

धरणै री तयारी बाबत 16 अप्रैल नै जयपुर मांय फेरू बैठक राखीजी। बैठक मांय राजस्थानी भासा मान्यता समिति, राजस्थान रौ गठन करीज्यौ। धरणै री आयोजन समिति मांय के. सी. मालू नै संयोजक, सुरेश खंडेलवाल नै सह संयोजक, रवि अग्रवाल, डॉ. अमरसिंह राठौड़, प्रो. कल्याणसिंह शेखावत, पदम मेहता, हेमजीत मालू, डॉ. राजेन्द्र बारहठ, देवकिशन राजपुरोहित, मोहन कटारिया, डॉ. सुखदेव राव, डॉ. अशोक गहलोत, गौतम अरोड़ा, गौरीशंकर

कुलचंद्र, मुकेश गोदारा, सत्यनारायण राजपुरोहित, सवाईसिंह चारण, सुरेन्द्र लांबा री समिति सारू कोर कमेटी बणी अर सांसद अर्जुनराम मेघवाळ रै संरक्षण अर मारगदरसण मांय धरणौ लगावण री तेवडी। इण बैठक मांय रूपरेखा अर जिम्मेदारियां तय करीजी। औ तै करीज्यौ कै धरणै रौ संयोजन जयपुर अर दिल्ली री कोर कमेटी (कंट्रोल रूम) करसी। छात्र मोरचा नै धरणै रौ प्रचार-प्रसार, जनजागरण, युवावां नै दिल्ली सारू ले जावण री मोटी जिम्मेदारी सूंपीजी।

छात्र मोरचौ आखै राजस्थान मांय धरणै नै सफळ बणावण सारू कार्यकर्तावां सूं टीम वर्क करवायौ। मारवाड़ मांय मोरचा रा संरक्षक डॉ. उम्मेदसिंह सेतरावा, डॉ. गजेसिंह राजपुरोहित, डॉ. अशोक गहलोत, गौतम अरोड़ा, रामसिंह राठौड़ आद धरणै री तयारियां सारू आखै मारवाड़, उदयपुर संभाग मांय डॉ. राजेन्द्र बारहठ, शिवदानसिंह जोलावास दिल्ली धरणै रै प्रचार-प्रसार री कमान संभाळी। इण भांत राजस्थानी भासा मान्यता समिति, राजस्थान कानी सूं थरपीज्यै इण धरणै मांय आखै भारत में थापित राजस्थानियां री न्यारी-न्यारी संस्थावां सूं जुड़ोड़ा मायड़ भासा रा हेताळु, साहित्यकार अर जनप्रतिनिधि पूग्या। राजस्थान सूं लगेटगै 65-70 बसां जंतर-मंतर पूगी। धरणै रौ संयोजन के. सी. मालू करियौ। आखै राजस्थान मांय प्रिंट मीडिया, इलैक्ट्रानिक मीडिया, सोशल मीडिया माथै 6 मई रै दिल्ली धरणै नै जन आंदोलन बताईज्यौ। इणरौ प्रभाव औ व्हियौ कै राजस्थान सरकार रा संसदीय कार्यमंत्री राजेन्द्र राठौड़ 28 अप्रैल नै केबिनेट बैठक में राजस्थानी भासा री मान्यता रौ समर्थन करियौ। धरणौ सुबै 11 बज्यां सूं सिंझ्या 4 बज्यां ताई चाल्यौ।

धरणै नै कोटा सांसद ओमजी बिड़ला, राजस्थान रा शिक्षा राज्यमंत्री वासुदेवजी देवनानी, महाराष्ट्र सरकार रा मुख्य सचेतक राज के. पुरोहित, जोधपुर शहर विधायक कैलाश भंसाली, विधायक जोगाराम पटेल, राजनेता लोकेन्द्रसिंह कालवी, पूर्व विधायक जोगेश्वर गर्ग, राजस्थानी भासा मान्यता समिति रा अध्यक्ष के. सी. मालू, देवकिशन राजपुरोहित, प्रवक्ता डॉ. अमरसिंह राठौड़, सुरेश खंडेलवाल, पदम मेहता, डॉ. अर्जुनदेव चारण, पद्मश्री चंद्रप्रकाश देवल, प्रो. देव कोठारी, लक्ष्मणदान कविया, डॉ. भरत ओळ्य, ओम पुरोहित 'कागद', डॉ. हरिमोहन सारस्वत रूख, मोहन आलोक, प्रो. कल्याणसिंह शेखावत, डॉ. सत्यनारायण सोनी, मालचंद तिवारी, दुलाराम सहरण, रामसिंह राठौड़, डॉ. गजेसिंह राजपुरोहित, श्याम महर्षि, पृथ्वीराज रतनू, डॉ. राजेन्द्र बारहठ, रामस्वरूप किसान, विनोद स्वामी, ओम नागर, घेवरचंद सारस्वत, डूंगरराम गेदर, मनोज स्वामी संबोधित करियौ।

इण अतिहासि विसाल धरणै नै सफळ बणावण में केई राजस्थानी संगठनां रौ योगदान रैयौ। दिल्ली मांय बस्यै प्रवासी राजस्थानी संगठन, राजस्थान संस्था संघ महताळु भूमिका निभायी। धरणै सारू पूगणिया कार्यकर्तावां रै ठैरण अर खावण-पीवण री वैवस्था करी। राजस्थानी भासा मान्यता समिति, राजस्थान रौ टीम-वर्क, कुसल निरदेसन, संयोजन धरणै नै सफळ बणायौ। छात्र मोरचा रा कार्यकर्ता जी-जान सूं पूरी ताकत सागै आखै राजस्थान रा भासा हेताळुवां नै अेकठ करण रा जाझा जतन करिया। इण अतिहासिक धरण सूं नुंवी आस जागी है

कै आवण वाळा दिनां मांय बेगी ई राजस्थानी संविधान री आठवीं अनुसूची मांय सामळ बेगी होवैला। राजस्थानी भासा री संवैधानिक मान्यता रै आंदोलन सूँ छात्र-वरग अर जनप्रतिनिधियां सागै आखै भारत री सांस्कृतिक संस्थावां रौ जुड़णौ अेक महताऊ संकेत है। इण भांत औ आंदोलन अबै जन आंदोलन रौ रूप लेय चुक्यौ है।

श्यामसुंदर भारती री काव्यकृति रौ विमोचन

जोधपुर। उर्दू, हिंदी अर मातृभासा राजस्थानी रा ख्यातनाम कवि श्यामसुंदर भारती रै काव्य-संग्रै 'अेक दीवौ अंधारा रै खिलाफ' रौ विमोचन कार्यक्रम जोधपुर रै नॉर्थ वैस्टर्न रेलवे अेम्पलाइज यूनियन रा सभागार में गुरुवार 30 अप्रैल 2015 नै संपन्न हुयौ। इण कार्यक्रम रौ बडेरचारौ मानीता कवि-आलोचक डॉ. अर्जुनदेव चारण करियौ। सिरै मिजमान इतिहासकार प्रोफेसर जहूरखां मेहर हा।

जोधपुर रा नामी साहित्यकारां, रंगकर्मियां अर मातृभासा राजस्थानी रा हेताळुवां सूँ राणोराण भस्चै सभागार में जयनारायण व्यास विश्वविद्यालय रै राजस्थानी विभाग रा अध्यक्ष डॉ. गजेसिंह राजपुरोहित आपरौ परचौ पढता थकां श्यामसुंदर भारती रै व्यक्तित्व अर कृतित्व माथै उजास न्हाकतां कैयौ कै 40 बरसां सूँ वै लगोलग साहित्य री मून साधना में लीन है। इण साधना में वै साहित्य री सगळी विधावां में काम करियौ है जिकौ सरावणजोग है।

मानीता साहित्यकार आईदानसिंह भाटी रै पत्र रौ वाचन युवा साहित्यकार वाजिद हसन काजी करियौ। आईजी आपरै परचै मांय भारती जी रै काव्य में राजस्थानी संस्कृति अर परंपरावां नै जीवती राखण री खेचळ अर गंभीर कोसिस नै सरायी। सिरै मिजमान जहूरखां मेहर आपरा विचार राखतां कैयौ कै भारती जी राजस्थानी लोकोक्तियां अर लोकथावां नै कविता में ढाळ'र जग रै सांम्ही राखै, औ काम घणौ महताऊ है।

आपरै अध्यक्षीय उद्बोधन में डॉ. अर्जुनदेव चारण कैयौ कै कविता किणी भासा री हुवौ, वा अेक प्रार्थना है जिकी कवि आपरै हिवडै सूँ अरज करै।

इण अवसर सभागार में उर्दू रा चावा शायर शीन काफ़ निज़ाम, राजस्थान संगीत नाटक अकादमी रा पूर्व अध्यक्ष रमेश बोरणा, वरिष्ठ साहित्यकार न्यायमूर्ति मुरलीधर वैष्णव, मदन मोहन परिहार, माणक रा संपादक पदम मेहता, हाशम खां झाड़ोद, केसरीमल शर्मा 'विमल', डॉ. सत्यनारायण, कैलाशदान, दिनेश सिंदल, मोईनुद्दीन काजी, डॉ. पद्मजा शर्मा, अनिल अनवर, अब्दुल नईम सिलावट, रज़ा मोहम्मद, गुलज़ार अहमद, शिक्षा अधिकारी शब्बीर हुसैन, दीपा परिहार, छगनराज राव, अेजाज खान पठान रै साथै सैकडूँ साहित्य प्रेमी मौजूद हा। सभागार रै बारै भारती जी रा प्रशंसक अमजद खान 'शादाब', नूरूल हसन काजी, ओमप्रकाश गोयल, जहूर अली रंगरेज, अशफ़ाक़ फौजदार वारी सिरजण जात्रा री प्रदरसणी लगाई। कार्यक्रम रौ संचालन मज़ाहिर सुल्तान करियौ। सागर भारती आभार जतायौ।